

萬 有 文 庫

第 二 集 七 百 種

王 雲 五 主 編

林 文 忠 公 政 書

(三)

林 則 徐 著

商 務 印 書 館 發 行



林文忠公政書

(三)

著 徐則林

國學基本叢書

林文忠公政書

乙集 使粵奏稿

卷五

附奏新頒夷人治罪專條內請酌易字樣片

再臣等准刑部咨通行夷人治罪專條內開一夷人帶有鴉片煙入口圖賣者爲首照開設窩口例斬立決。爲從同謀者絞立決等語。在衡情定議之意。以入口二字爲關鍵。原因海洋遼闊。口以外直連夷洋。口以內始爲內地。劃清界址。本極分明。惟覈諸粵省貿易章程。尙有不得不防其影射之處。緣廣東中路通商。向以船進虎門。乃爲入口。番船初到之時。先於虎門口外寄碇。如擔杆山。銅鼓洋。大嶼山。伶仃洋。尖沙嘴。仰船洲。琵琶洲。上下磨刀。沙灣。石筍。九洲。沙瀝潭。仔雞頸等洋。皆向准夷船寄泊之所。此等洋面。雖皆在老萬山以內。而老萬山並無口門。無從稽察。是以定例夷船。必雇引水小船。報明引入虎門口內。停泊黃埔。始得開艙驗貨。按則納稅。投行互市。其在虎門以外。寄泊中路各洋者。皆未入口之船也。而私售鴉片之弊。正在於此。蓋由中路而東而北。則歷潮州南澳。以達閩浙北洋。凡甯波。上海。山東。天津。奉天之商船。皆所通行。由中路而西。則本省之高廉雷瓊。船隻往來。亦絡繹不絕。所有各路興販鴉片。多在洋面舟

次與夷人交易。盤運過船。卽或在口內議買。亦須赴口外運貨。此內地快蟹拖風等艇。所以乘間出沒。而夷人囤貯鴉片之躉船。常泊伶仃等洋。職是故也。口內夾帶鴉片者。無非民船。向來挈獲之案。歷歷可據。若夷船夾帶入口。雖亦難保必無。然經總散各洋商。逐層保結。又於入口之後。卽行開艙起貨。立見底蘊。故夷人所帶鴉片。每先卸於口外躉船。然後入口。今若以是爲界。彼正得以藉口趨避。難保不於虎門口外。再設躉船。恐辦理又形棘手。且英國領事義律。於繳煙完竣之後。曾據具稟。懇求在澳門裝貨。臣等以其顯違定例。批駁不准。該領事尙懷觀望。是以近日他國之船。進黃埔者。已有十四隻。而英吉利所屬港脚之船。尙停虎門口外之尖沙嘴一帶。支飾遷延。臣等惟飭師船嚴密防範。一面示諭各夷船。如無鴉片。卽應入口報驗。有鴉片而首繳淨盡者。亦准入口。若自揣不敢報驗。卽日揚帆回國。亦尙可免窮追。倘透漏售私。萬難曲宥。此時該夷正在憚於入口。故口外之弊。比之口內。尤常嚴防。可否仰懇聖裁。將新例入口字樣。酌易爲來內地等字。稍示渾涵。俾無可以藉口之處。恭候命下。祇遵。臣等爲夷情狡獪。加意周防。起見。不揣冒昧。合詞附片。瀆陳。伏祈聖鑒訓示。謹奏。

會奏巡緝營員訪有劣蹟請革審摺

奏爲原派巡緝營員。於撤巡後。訪有劣蹟。請旨革職審辦。恭摺奏祈聖鑒事。竊照廣東各海口。囤販鴉片。偷漏紋銀。久已積爲弊藪。而港汊叢雜。防範難周。是以向設巡船。分投查緝。旣不能不派委備弁。亦不能不雇用眼線。但其中奉公守法者。緝捕多非所長。而破案得力者。又難保別無私弊。惟有信賞必罰。懲勸兼施。獲犯旣多。固未便沒其勞績。一有弊竇。卽不敢稍予姑容。蓋此輩駕馭之難。各省皆然。而尤莫甚於

粵東諸案皆然。而尤莫甚於鴉片也。卽如前任兩廣督臣盧坤任內。捐設巡船。維時副將秦裕昌。以捐職都司。王振高帶領壯丁徐廣。素諳捕務。稟准隨船巡緝。先後獲犯多名。經盧坤將王振高飭發香山協水師效力。並賞給徐廣記委頂戴。嗣升任撫臣祁墳。兼署督篆。復於挈獲盜犯潘亞。有等案內。奏奉諭旨。王振高著該督留心察看。如果一二年後。再著勞績。卽奏請以都司補用。欽此。臣鄧廷楨抵任後。因王振高尚須察看。當發陸路南韶連鎮差委。旋經部駁。仍發水師效力。並未派令巡查。嗣因捕務緊要。修復巡船。以資緝匪。據署臣標中軍副將韓肇慶。派委守備戴文彪。千總蔣大彪。倫朝光。仍帶記委徐廣。壯丁梁恩陞等。往來外海內河。巡查緝捕。先後挈獲載運紋銀出洋。販賣鴉片。以及鹽梟土盜各犯。共二百六十五名。起獲紋銀番銀共六萬二千六百餘兩。煙土一萬六百餘箱。均經奏報題咨在案。除戴文彪奉部簽陞江西都司。今已病故外。倫朝光。蔣大彪。以疊獲紋銀。先後題陞守備。梁恩陞亦以獲犯勞績。拔補外委。嗣於十七年秋間。臣鄧廷楨與前撫臣祁墳。承准廷寄。因有人陳奏王振高。徐廣。卽亦沙廣。梁忠。卽梁恩陞等。暗開窰口等因。諭旨查究。當經欽遵密查。實無開設窰口憑據。合詞恭摺覆奏。並附片瀝陳此等用以緝捕。本屬棄短取長。仍不時留心察看。如查有弊端。卽從嚴懲辦。不敢稍存迴護。荷蒙鑒察。各在案。此後臣鄧廷楨更加留心察看。雖據報挈獲鴉片賊犯。絡繹不絕。而獲銀之案。較前頓少。因思巡船出赴外海。究恐稽察難周。安知不恃特委之名。藉端嚇詐。且慮各處營縣。因有另設巡船。轉相觀望。遂於十八年撤去前項巡弁。以專營縣責成。一面追查從前委巡之王振高。及近年之蔣大彪等。有無假公濟私。尙未得有實據。臣林則徐奉命來粵。密訪海洋利弊。知先後管駕巡船之弁丁。以及眼線人等。多不理於人口。而

亦未得確憑。迨五月內銷化夷船煙土事竣。由虎門回至省垣。訪得前在巡船充當頭舵之馮亞潤。周亞保等。併挈到案。提同常作眼線之已革外委保安泰。隔別研訊。據供巡船挈獲販煙運銀各案匪犯。俱在水次截挈人賊。並獲。並無妄挈邀功。挾嫌栽害情弊。惟所解煙土。如有零星餘剩。各船間或勻分。若在偏僻口門。遇著販煙之船。亦有送給洋銀。聽其開去等語。是侵匿賄縱之弊。已屬顯然。臣等立提王振高。倫朝光。梁恩陞。徐廣。反覆詰訊。雖不敢盡行狡賴。而供詞尙多閃爍。且因守備蔣大彪。引見未回。倫朝光等。率皆諉諸蔣大彪一人。其爲前此通同舞弊。現在推卸避就。尤可概見。當此力除鴉片之際。正須肅清捕務。杜絕欺朦。臣鄧廷楨。先因各該弁獲犯多名。雖經隨案。聲請恩施。予以升擢。今既查有劣蹟。愧恨交深。必當倍加嚴辦。斷不敢意存迴護。稍予姑容。致負聖明委任。除外委梁恩陞。記委頂帶徐廣。均已由臣鄧廷楨斥革。並將王振高。捐納都司職銜。咨部革退。一面行文前途。截挈蔣大彪。回粵聽審。外相應請旨。將准陞水師提標後營守備蔣大彪。順德協右營守備倫朝光。一併革職。以便提同各犯證。嚴審確情。按擬懲辦。以爲備弁營私者戒。臣等謹會同水師提督臣關天培。合詞恭摺具奏。伏乞皇上聖鑒訓示。謹奏。

會奏英夷抗不交兇嚴斷接濟查辦情形摺

奏爲英吉利國領事義律。因求在澳門裝貨不准。輒將該國貨船。阻留口外。圖賣新來鴉片。適有夷人毆斃華民命案。抗不交兇。照例斷其接濟。並勒兵分堵海口。該夷與奉逐各奸夷。均已畏懼出澳。寄住貨船。臣等往來香山虎門。相機督辦。先將大概情形。恭摺奏聞。仰祈聖鑒事。竊臣林則徐。奉命來粵。與臣鄧廷楨等。宣示天威。夷人咸知震懼。前經收繳躉船鴉片二萬餘箱。維時英吉利國領事義律。在省城夷館。自

行查數報繳。前後連具十餘稟。情詞均甚恭順。臣等於批諭之中。時加稱獎。該領事亦自以爲榮。頗形踴躍。覈計繳清煙土。較原稟溢出尙多。論者以爲英夷平日桀驁性成。今乃倒篋傾筐。帖然馴伏。是千里之重貨盡擲。卽百年之痼疾可除。而臣等熟計深籌。尤以本年來船夾帶爲慮。蓋該國遠在數萬里外。當其開船之日。尙未知天朝新例。如此森嚴。旣而潛帶而來。必思顧其成本。而中國力除巨患。正當於得手之際。拔盡根株。豈得將新船轉予放鬆。致使前功盡棄。是以臣等請定治罪專條。並立限期首繳。仰荷聖明。俞允。飭定新例頒行。其新例未到之先。各國貨船。卽已陸續到粵。當令洋商通事。諭知現辦章程。船內無鴉片者。進口報驗。有鴉片而自首。全行呈繳者。准予奏請免罪。並許驗明進口。若自揣不敢報驗。卽日揚帆回國。亦免窮追。使各國夷商。得以早定主見。迨頒到新例。又復傳諭周知。截至七月初八日。進口報驗夷船。共一十七隻。經粵海關監督臣豫堃。驗明均無鴉片。准其開艙貿易。不進口而回國者。亦有三隻。其中卽有鴉片。當不至毒流內地。惟英吉利所屬港脚貨船到時。本亦卽擬進口。旋被義律阻止。停泊虎門口外之尖沙嘴一帶。緣義律爲該國領事。該國主給與權柄。得以約束衆夷。先前繳土之時。力能號召。南澳福建等處之船。悉行駛回虎門。一體呈繳。迨繳完後。義律稟辭下澳。尙據遞具一稟云。違禁犯賣一弊。悞及正經貿易。貽累人之家業。其害甚重。亟須設法。早除此弊於常久。如准委員來澳。會同妥議章程。其違禁犯賣之弊。可冀常遠除絕等語。臣等以爲真心除弊。大加批獎。並會委佛山同知劉開域。赴澳與之覈議。且將奏准頒賞之茶葉一千六百四十箱。發往給賞。以便空羣。迅速回帆。詎劉開域未到之先。義律於四月二十四日。續遞一稟云。本國船隻進埔。須候奉到國主批諭。方可明白轉飭。或蒙格外施恩。令在

澳門裝貨感戴靡既等語。臣等接閱之下。均相詫異。始知前稟章程一語。乃係別蓄詭謀。蓋澳門孤峙海隅。實可周通內地。向惟西洋夷人。准設貿易額船二十五隻。起卸貨物。不納關稅。自明代而已然。英夷惟利是圖。久深豔羨。故於繳土之後。希圖破例效尤。此端一開。則粵海關幾同虛設。且溯查嘉慶年間。鴉片之浸淫流毒。皆由澳門囤聚發販。年盛一年。道光二年。葉恆澍犯案。始將澳門囤所撤散。其後變爲躉船。今躉船之積土甫除。若澳門之囤所又起。何異驅虎進狼。故不得不決絕批駁。且貨船皆從該國給予牌照。令赴內地經商。豈有已經到粵。始候該國王批諭之理。亦於稟內指破其說。義律詭計不行。闇然消阻。委員劉開域到澳。伊遂不理。問其定何章程。據稱不准在澳裝貨。便無章程可議。即傳領茶葉。亦不敢領。臣等以此項奏准給賞。原係出於格外。既無福承受。即不值給發。此後凡有批諭。伊皆不肯接收。在犬羊之性無常。原不必與之計較。然有不可聽其觀望者。如繳清煙土之空躉。尙有一半未行。奉旨驅逐之奸夷。亦有數名未去。不能因其不接諭帖。轉任逗留。故仍委員赴澳嚴催。並飭令西洋夷目。協同攆逐。至該國貨船陸續來粵。計至此時。已有三十二隻之多。該夷商滿載而來。將本求利。無不早圖進口。開艙貿易。乃被義律一人。把持阻撓。俱在尖沙嘴一帶聚泊。廣東天氣炎熱。各船中如洋米。洋布。棉花等貨。難免潮濕霉爛。業已怨懟同聲。臣等令洋商通事。齎諭分赴各船。剴切開導。催令進口。咸稱義律係伊國領事。不得不惟令是從。而其中潛帶鴉片之奸夷。既不甘呈繳。又不願空回。則正樂於遷延。冀以私售禁物。現因各口查緝嚴緊。整箱煙土。不能運入內洋。而蛋艇漁舟。與番舶每相貼近。乘間買其零土。以圖轉售獲利。者節經文武拏獲。已據確切供明。且查夷人私放三板。裝載鴉片。潛赴偏僻口門。以木片爲招帖。寫明鴉

片一個。洋銀幾圓字樣。隨潮流入海口。以賤價誘人售買。是義律之勒令夷船聚泊口外。仍爲圖賣新來鴉片。恐被進口搜查起見。夷情詭譎。如見肺肝。卽無別滋事端。亦不得容其於附近口門。佔爲巢穴。况夷人酗酒打降。習以爲常。五月二十七日。尖沙村中有民人林維喜。被夷人酒醉行兇。棍毆斃命。經新安縣梁星源驗明頂心及左乳下。各受木棍重傷。訊據見證鄉鄰。僉稱係英吉利國船上夷人所毆。衆供甚爲確鑿。諭令義律交出兇夷。照例辦理。將及兩月。延不肯交。臣等給與諭函。亦竟始終不接。竊思人命至重。若因英夷而廢法律。則不但無以馭他國。更何以治華民。義律肆意抗違。斷非該國王令其如此。安可聽其狂悖。而置命案於不辦。任奸宄以營私。壞法養癰。臣等實所不敢。恭查嘉慶十三年。英國兵頭都路厘等在澳門違犯禁令。欽奉諭旨。卽實力禁絕柴米。不准買辦食物等因。欽此。此時義律與各奸夷。均住澳門前。以裝貨爲詞。顯有佔踞之意。今更種種頑抗。自應遵照嘉慶十三年之例。禁絕英夷柴米食物。撤其買辦工人。臣等於七月初八日。駐劄香山縣城。勒兵分布各處要口。俾知儆畏。仍曉諭在澳華民。及西洋各國夷人。以此舉專爲英夷違犯。不得不制以威。與別國均無干涉。毋庸驚擾。且查例載夷商銷貨後。不得在澳逗留等語。今該夷既不進口貿易。是不銷貨。卽不當住澳。應與奉逐各奸夷。均照例不准羈留。臣等諭飭之後。澳內西洋夷目。亦卽遵諭。一同驅逐。自七月初九日至十九。旬之內。義律率其家眷。暨奉逐未去之奸夷。央噸等。並散住澳內。英夷共五十七家。悉行遷避出澳。寄住尖沙嘴貨船。及潭仔空躉船上。據署澳門同知蔣立昂。香山協副將惠昌耀等稟稱。該夷窮蹙倉皇。已覺十分兢懼等語。臣等察其平日飲食居處。華靡相夸。今寄住客船。顯有抑鬱難堪之狀。又經禁賣食物。雖其船內糗糧不乏。而所嗜之

肥膿燔炙日久必缺於供。且洋面不得淡水。須於山澗汲泉。若汲道俱斷。此一端卽足以制其命。彼貿易斷不肯歇手。衆夷正不得齊心。要令我範圍似已確有把握。惟倔強之性。未嘗稍受折磨。此番控馭周防。尙不免稍需時日。而欲永杜鴉片之害。實以此爲喫緊機關。未便稍涉游移。復貽後患。查潭仔與澳門相近。而尖沙嘴則與虎門相近。臣等酌商調度。擬往來於香山虎門之間。或合或分。自當隨時妥辦。旣不敢冒昧以僨事。亦不敢示弱以長驕。必俟交出兇夷。掃淨煙土。貨船進埔。報驗空蕙。悉數開行。一切恪遵法度。然後給還買辦工人。仍准住行住澳。凡在粵東士庶。旣知夷人習爲虛憍。並知臣等慎密修防。沿海閭閻。現俱十分安謐。堪以仰慰聖懷。謹將辦理大概情形。會同廣東巡撫臣怡良。水師提督臣關天培。粵海關監督臣豫堃。合詞恭摺具奏。伏祈皇上聖鑒。謹奏。

會奏九龍洋面轟擊夷船情形摺

奏爲英夷義律於出澳後。率領該國夷船。以索食爲名。突向師船開礮。經參將賴恩爵等奮勇抵禦。大挫其鋒。該夷旋向澳門同知投遞懇求說帖。並託西洋夷目代爲轉圜。臣等仍當相度機宜。酌籌勦撫。先將現辦情形。恭摺奏祈聖鑒事。竊照英吉利國領事義律。前因求在澳門裝貨不准。輒將該國新來貨船阻留尖沙嘴洋面。圖賣鴉片。並主令奸夷空蕙。任意逗遛。又命案抗不交兇。給諭亦不接受。是以臣等斷其接濟。並勒兵分路嚴防。義律與住澳各英夷。悉行遷避出澳。經臣等於七月二十四日。會摺具奏在案。嗣知被逐奸夷。多住尖沙嘴船上。臣林則徐。臣鄧廷楨。當卽移駐虎門。就近調度。臣關天培自七月以來。常在沙角洋次。督領本標師船。與調到之陽江碣石兩鎮舟師。排日分合操練。以振軍威。並加派弁兵。協防

排鍊添雇水勇。裝配火船。以備隨時調遣。旋據探報。義律將該國貨船中。挑出船身較大之得忌刺吐等船兩隻。乃屢逐未出之空躉數隻。一併湊集礮械。假扮兵船。又有自夷埠新來之兵船一隻。番梢礮械較多。拋泊各夷船之前。恃爲保護。臣等於各路水陸要口。雖已嚴密佈置。不使一處空虛。仍諄諭領兵各員。不得輕舉肇衅。原冀義律早知悔悟。果能交兇繳土。將貨船陸續進關。即可撤去兵防。照常貿易。詎七月二十九日。接據大鵬營參將賴恩爵稟稱。該將帶領師船三隻。在九龍山口岸。查禁接濟。防護礮臺。該處距尖沙嘴約二十餘里。七月二十七日午刻。義律忽帶大小夷船五隻。赴彼先遣一隻。攜上師船。遞稟求爲買食。該將正遣弁兵。傳諭開導。聞夷人出其不意。將五船礮火一齊點放。有記名外委之兵丁歐仕乾。彎身料理軍械。猝不及防。被礮子打穿脅下。殞命。該將賴恩爵。見其來勢兇猛。亟揮令各船及礮臺弁兵。施放大礮。對敵擊翻雙桅飛船一隻。在旋渦中滾轉。夷人紛紛落水。各船始退。少頃。該夷來船。更倍於前。復有大船攔截鯉魚門。礮彈紛集。我兵用網紗等物。設法閃避。一面奮力對擊。瞭見該夷兵船。駛來幫助。該將弁等忿激之下。奮不顧身。連放大礮。轟擊夷人多名。一時看不清楚。但見夷人急放三板。下海撈救。時有兵丁陳瑞龍一名。手舉烏槍。斃一夷人。被回礮打傷陣亡。殆至戌刻。夷船始遁。回尖沙嘴。計是日接仗五時之久。我兵傷斃者二名。其受傷重者二名。輕者四名。皆可醫治。師船間有滲漏。桅篷亦有損傷。均卽趕修完整。嗣據新安縣知縣梁星源等稟報。查夷人撈起屍首。就近掩埋者。已有十七具。又漁舟疊見夷屍。隨潮漂淌。撈獲夷帽數頂。並查知假扮兵船之船主得忌刺吐。手腕被礮打斷。此外夷人受傷者。尤不勝計。自此次對仗以後。巡洋舟師。均恨奸夷先來尋衅。巡緝愈嚴。八月初五日寅刻。守備黃琮等率領

兵勇在潭仔洋面偵見蝦笏小艇。靠攏夷船一隻。帶同引水。認明係屢逐未去之丹時那躉船。知又潛賣鴉片。當卽上前查拏。該躉船水手數人。卽先跳入小艇。飛槳逃竄。其在船之人。正欲開礮。經黃琮等先擲火斗火礮。船中火發。衆夷始行走出。除鼻水登岸外。獲解伙長工人二名。現飭審究。該丹時那躉船。亦卽被火燒燬。並無傷人。各據稟報前來。臣等查英夷欺弱畏強。是其本性。向來帥船。未與接仗。祇係不欲釁自我開。而彼轉輕視舟師。以爲力不能敵。此次乘人不覺。膽敢先行開礮。傷害官兵。一經奮力交攻。我兵以少勝多。足使奸夷膽落。卽空躉屢驅不去。故智復萌。一炬成灰。亦可懲一儆百。正在察看該夷動靜。以籌操縱機宜。茲八月初九日。接據署澳門同知蔣立昂等稟稱。初七日。義律潛至澳門。該同知等聞信。正欲驅逐。旋據西洋夷目代遞義律說帖一紙。內寫英吉利國領事義律敬字上澳門軍民府大老爺清鑒。義律在粵有年。每奉大憲札行。辦事無不認真辦理。而此次豈有別心乎。蓋義律所求者。惟欲承平。各相溫和而已。謹此奉知等語。並據西洋夷目以義律懇求伊等代爲轉圜。欲請該同知訂期與該夷目面商會議。明定章程。義律仍已回船。不敢留澳等情。臣等覈其帖內。雖無狂悖語句。第自謂認真辦事。而竟潛賣鴉片。庇匿兇夷。自謂豈有別心。而以索食爲名。先行開礮。是其言又安可遽信。然既經此番摧挫。其慄畏之狀。亦已情見乎詞。在臣等所責其遵令而行者。亦不過繳土交兇。貨船進口等事。並非苛以所難。究竟西洋夷目所請代爲稟商之處。是否卽能將此數事遵照辦理。抑或另有干求。臣等已批飭署澳門同知蔣立昂於會議後。縷晰稟陳。以憑覈辦。此後義律果能恪循法度。不越範圍。自當宣布皇仁。寬其既往。若萬不得已。仍須制以兵威。臣等亦已密定機宜。蓄養精銳。於山海形勝。逐一詳細講求。且察看水陸官

兵似亦皆能用命。總期上足以崇國體。下足以懾夷情。不敢稍畏一日之難。致貽百年之患。以仰副聖主恩威並濟。中外兼綏之至意。除俟籌議覆到。覈明准駁。再行具奏外。所有現辦情形。謹合詞恭摺具奏。伏祈皇上聖鑒。再廣東沿海閩閩。仍俱十分靜謐。各國貨船。照常進口。計自本年五月至今。已進二十五隻。合併聲明。謹奏。

林文忠公政書

乙集 使粵奏稿

卷六

會奏巡閱澳門情形摺

奏爲會同巡閱澳門。抽查華夷戶口。傳見西洋夷目。宣示德威。恭摺具奏。仰祈聖鑒事。竊照廣東澳門一區。在廣州府香山縣之東南。距縣治一百三十餘里。東西南三面環海。惟北面陸路。可達縣城。自縣城南行一百二十里。曰前山寨。設有海防同知。暨前山營都司駐劄。再迤南十五里。建有關牐一座。駐兵防守。爲扼吭拊背要區。出關卽入澳境。溯自前明。許西洋夷人寄住。歲輸地租銀五百兩。由香山縣徵收。澳內營造夷樓。棟宇相望。並建礮臺六座。以防他夷。其房屋除西夷自住外。餘皆賃給別國夷人居住。而以英吉利國爲較多。西夷挈眷而居。歷今三百餘年。踐土食毛。幾與華民無異。雖素稱恭順。不敢妄爲。而旣與各島夷朝夕往來。卽難保無牟利營私。售賣鴉片情事。本年臣林則徐奉命來粵。與臣鄧廷楨。悉意商酌。以躉船雖在外洋。而澳門實爲夷商聚集之所。且其間華夷雜處。漢奸勾串尤多。若不從澳門清源。則內外綫索潛通。仍恐漸成弊藪。是以於四月間。檄委署佛山同知劉開域。署澳門同知蔣立昂。香山縣知縣

三福署香山縣縣丞彭邦晦。仿照編查保甲之法。將通澳華民一體按戶編查。毋許遺漏。並督同該夷目。搜查夷樓有無屯貯鴉片。旋據該員等查明戶口。造冊呈送。計華民一千七百七十二戶。男女七千零三十三丁口。西洋夷人七百二十戶。男女五千六百一十二丁口。英吉利國僑居夷人五十七戶。並查明虎門收煙之時。有英夷咽義吐。將蘆船煙土。偷運八箱入澳。被西洋夷目查挈。將原土押交英國副領事參遜。一體呈繳。又據稟該夷目自行挈獲夷人啞思時零煙。在馬頭焚燒。將啞思時收監。按照夷法問罪。出具此外並無存貯煙土甘結。稟請親臨查辦前來。臣等因驅逐英國住澳奸夷。由省移駐香山。遂於七月二十五日。自香山起程。二十六日清晨。統領將備管帶弁兵。整隊出關。該夷目做遮嗎地沙。率領夷兵一百名。迎於關下。兵總四人。戎服佩刀。夷兵肩烏槍。排列道左。隊內蕃樂齊作。俟臣等輿衛行過。兵總導領夷兵蕃樂隨行。至新廟。夷目做遮嗎地沙。具手版稟謁。命之進見。該夷免冠曲身。意甚恭謹。臣等宣布恩威。申明禁令。諭以安分守法。不許屯貯禁物。不許狗庇奸夷。上負大皇帝撫綏懷柔至意。該夷點頭領會。據向通事聲稱。夷人仰沐天朝。蒙養二百餘年。長保子孫。共安樂利。中心感激。出於至誠。何敢自外生成。有干法紀。現在隨同官憲。驅逐賣煙奸夷。亦屬分內。當爲之事等語。以手拄額者三。敬謹退出。臣等當卽賞以絹扇茶糖。並頒賞夷兵牛豕麪腊數十事。番銀四百圓。再辭乃受。臣等卽入三巴門。經三巴寺。關前街。娘媽閣。至南灣。督率隨員。抽查夷樓民屋。均與冊造相符。其賃給英夷房間。自各夷離澳後。現俱關閉。覆加訪察。自春間查辦以後。該西洋夷樓。實無存貯煙土情事。隨由南灣。仍回前山。所有經過三巴媽閣。南灣各礮臺。俱發一十九礮。詢之澳人。稱係該國大禮。以示尊敬。不輕舉行。兵總率領夷兵。送至關牖。始

行撤退。臣等沿途察看。不但華民扶老攜幼。夾道歡呼。卽夷人亦皆疊背摩肩。奔趨恐後。恬熙景象。疇載同深。此臣等巡視澳門之實在情形也。臣等伏思夷人心性反覆靡常。挾詐懷私。事所時有。如果始終馴伏。固當撫之以恩。若使微露矜張。卽當繩之以法。此次因查辦鴉片。執法甚嚴。澳夷震懾天威。是以倍形懇順。惟該處華夷叢雜。最易因緣爲奸。應請於每年秋間。查照現在編查之法。檄飭澳門同知。督同香山駐澳縣丞。編查一次。造冊通詳。再由督撫兩司。分年輪替。前往抽查。如有澳夷屯販禁煙。及庇匿別國賣煙奸夷等弊。卽行隨時懲辦。以清弊藪。而靖夷情。似於邊徼防維。不無裨益。是否有當。謹合詞恭摺具奏。伏乞皇上聖鑒訓示。謹奏。

會奏諭辦英夷情形摺

奏爲英夷領事義律。請將現泊粵洋夷船。聽官搜查。出具實無鴉片切結。其命案兇夷。亦願懸賞察究。並奸夷空躉。均請勒限逐回。謹將臣等諭辦情形。恭摺奏祈聖鑒事。竊臣等前因英夷種種違玩。照例斷其接濟。不許住澳。該夷旋向九龍師船覓食。先行開礮。我軍奮力回擊。大挫夷鋒。復將逗留賣煙之躉船。燒燬一隻。該夷領事義律。急向澳門同知。遞字懇求。並託西洋夷目。代爲轉圜。臣等當將相機勦撫緣由。於八月十一日。恭摺奏聞在案。臣等復思義律所遞之字。似知悔罪輸誠。然僅託諸空言。尙未見於實事。保非暫作緩兵之計。別生誦詐之謀。益當整肅軍威。嚴防靜鎮。一面仍給諭帖。責令呈繳新煙。勒交兇手。並將繳清煙土之空躉。奉旨驅逐之奸夷。速飭全行回國。卽令署澳門同知蔣立昂。傳諭去後。茲疊據蔣立昂稟覆。八月十五日。義律送給回信內稱。接到軍民府來文。轉發大人傳諭條款。領事極欲欽遵聖旨。將

違禁之鴉片。全行絕除。自應卽赴澳門。敍諭。以憑貴憲稟覆等語。十七日。義律至澳門。與西洋夷目同見。蔣立昂。復經該署同知。將臣等諭內各條。嚴切面諭。據通事傳譯。義律口稱。前因冒犯嚴威。疊奉諭飭。業已悔悟。欲求轉乞憲恩。情詞極爲恭謹。詰以奉諭條款。如何遵辦。義律答稱。未敢自行稟覆。仍具說帖。求爲轉稟。隨將說帖呈出。已據逐條登覆。蔣立昂因見所覆。尚有未協。面爲駁飭。復據義律添寫一紙。統求蔣立昂先行請示。蔣立昂卽將原件稟送。並請覈示前來。臣等查閱所覆各條。文義不甚通暢。而覈其大義。尙屬遵諭奉法。不敢抗違。如諭繳鴉片一節。據其登覆。意以該國有帶鴉片之船。先已令其回去。現泊尖沙嘴各船。俱請官憲搜查。若有鴉片。卽將貨船盡行沒官。嗣後在粵貿易夷人。與隨時來到之船。不論船主商人。傭工夥計。俱令逐名出結。由義律加具印結。方准貿易。未出結者。不准開艙。永遠照此辦理。如不認真。必致自取咎戾等情。臣等查英夷貨船。住泊尖沙嘴。不卽進口。原爲圖賣新煙起見。且節次挈獲賣煙奸民。已據供認在夷船零買。確有明證。是其所稱。並無煙土之說。實不可信。若不切實查辦。何能盡絕根株。臣等忿激之餘。已先與水師提臣密爲布置。將柴草火藥。裝配多船。擬將帶煙不繳之船。盡予燒燬。以除其害。然究以未分皂白。不忍玉石俱焚。繼又再四熟商。計惟臨以重兵。逐船搜檢。庶可分良莠而示勸懲。今該夷自願請搜。察其情詞。似極切實。臣等復又多方訪察。蓋該夷因見臣等堅持數月。料已無可希圖。遂將新到之煙。陸續帶回夷埠。是以前有夷船三船。先後駛回。近日復有三板夷划。紛紛開去。且挈獲出海買煙奸民彭亞開等。訊據供稱。伊於八月初旬。帶銀前往向買。卽據夷船回覆。現無鴉片。伊卽放空回來等語。是現在夷船已無煙土。似非虛誑。惟已去之士。固可不必窮追。而現泊之船。必須逐號搜

查以昭覈實。臣等現又諭令義律將尖沙嘴所泊英國貨船。按其到粵先後。挨次親驗其貨物。盡行盤至。剝船逐件搜查。果無夾帶鴉片。卽先押送入口。本船搬空之後。再行備細查明。如此則耳目昭彰。自無影射掩藏之弊。並恐載煙回去。夷船利心不死。或竟潛赴東西兩路。冀圖分銷。臣等現又飛飭沿海各營。准備師船。嚴密防範。並由中路抽撥兵勇。跟蹤躡緝。如有此等夷船駛至。卽行開礮夾擊。務使遺孽肅清。至出結一節。若論尋常吏事。原恐習爲具文。而臣等體察夷情。最重信字。是以臣林則徐初次諭令該夷。呈繳煙土。卽先揭出此一層。迨義律稟繳二萬二百八十三箱。或疑其言未必能踐。而深悉夷情者。咸決其必無失信。嗣果繳清煙土。有贏無絀。是其不肯食言。已有明驗。今其所擬逐名出結。分寫漢文夷字。由該領事加具印結。卽係遵照臣等原諭辦理。自應准其所請。惟查覈所擬出結語句。與現行新例。尙不盡符。臣等現又寫具結式。諭令遵照繕寫。若不如式具結。永不准其貿易。以此杜外來之鴉片。實足以昭信守於夷情。明有範圍。暗有把握。非具文所可同日而語也。至林維喜命案。據義律稱審得五人。酗酒皆無兇殺之罪。又稱當日上岸滋事。亦有米利堅人。請再細訪等語。當經蔣立昂。以此案供證確鑿。兇手實係英夷之言。向其駁詰。義律無可置辯。遂添寫說帖一紙。聲明懸賞洋銀二千圓。報知何人毆斃。憑據。倘能發覺。卽會官憲代稟等情。臣等復查義律船內。現在實有拘押夷犯五名。其非有意匿兇。尙屬可信。而實情不能審出。原亦無怪其然。至米利堅人於羣毆林維喜時。並不在場。不獨該國夷人。稟辯甚明。卽岸上各見證。供亦如一。且英夷獨託漢奸劉亞三等。與屍親說和。其爲並無米利堅人在場。更無疑義。臣等諭知義律。以所拘五人中。如不能審定正兇。何妨送請天朝官員。代爲審明。祇當辦一應抵之人。其餘仍皆發

回斷不連累。如仍自審。則再限十日。亦必可以審明。毋得再圖延緩。此外如空薨回國。請候北風開行。被逐奸夷。請留兩名在粵。皆經蔣立昂面加駁飭。隨又代求回澳。理清事件。六日內如數揚帆而去。臣等以所請尙在情理。爲日亦屬無多。當將此一層傳諭允准。仍派委文武在澳稽查催逐。不任踰限。並諭西洋夷目一體查催。以上各事宜。除俟逐一清釐。再行分別覈奏外。所有現在諭辦情形。謹會同水師提督臣關天培。合詞恭摺具奏。並繕錄義律原遞說帖。恭呈御覽。伏乞皇上聖鑒訓示。謹奏。

覆奏責令夷人出結甫經遵依片

再臣等先於春間收繳煙土之時。卽經諭令夷人務卽出具嗣後永不夾帶鴉片切結呈送。而該夷均不敢具結。繼又多方開導。堅執如前。且據義律稟稱。倘不能不取結。則英國人船無奈。祇可回國等語。臣等當以該夷回國之言。並非出自真心。不過憚於出結。強顏而作此言。蓋一經出結。則此後稍有夾帶。不但本犯罹於重法。卽該領事亦不能置身事外。是以心切遲疑。當經據實奏蒙聖鑒在案。嗣經御史步際桐條奏。以查辦夷船鴉片。雖責以萬分切實之結。亦將甘心出具。徒開含混之路等語。欽奉諭旨。著林則徐鄧廷楨。悉心籌畫。務使弊源盡絕。永杜含混之端等因。欽此。臣等竊思夷人正不敢出結。如可免取。最爲省事。繼又反覆籌酌。若竟任其抗結。則夷人夾帶之念。斷不能一日忘。蓋夷人最重然諾。卽議一事。訂一期。從不爽約。其視出結之事。絕無僅有。非比內地公牘。結多而濫。以致視爲泛常。彼愈不肯輕易具結。卽愈知其結之可靠。亦愈不能不向其飭取。是以設法辦理。直使該夷計窮心懾。至今始克遵依。臣等不敢因有人條奏。正可藉以自便。遂存趨易避難之見。致負委任。謹合詞附片覆奏。伏祈聖鑒。謹奏。

會奏英國躉船奸夷現已驅逐並飭取切結情形摺

奏爲英國躉船奸夷現已盡行驅逐其具結進口貨船查明實無鴉片未進口者飭取切結聽候查驗方准貿易命案兇手仍須勒兵催交恭摺奏祈聖鑒事竊臣等前因英夷義律阻攔該國貨船庇匿致命兇手並逗留空躉奸夷當經示以兵威斷其接濟該夷計窮力絀隨即悔罪求誠所有節次傳諭情形歷經奏聞在案嗣於九月初九日承准軍機大臣字寄欽奉上諭著林則徐等趁此警動之際力除弊竇所有該國大小船隻游奕洋面跡有可疑者均著驅逐出境等因欽此臣等遵查英國夷船應行驅逐出境者莫先於躉船自四月間煙土繳清卽經嚴催回國雖當時已開七隻而其餘尙在遷延總因該船前泊伶仃囤貯鴉片比之攬載他貨獲利倍蓰是以觀望徘徊冀俟煙禁或有稍弛之時復還故業迨八月間巡洋舟師將丹時那躉船燒燬之後該夷始覺驚慌不敢再圖久泊除威臣利是二船已賣與米利堅夷人改裝貨物又吐卒佛蘭吐二船查已破爛零星折賣外計駛出老萬山回國空船共二十三隻復查本年春間臣鄧廷楨奏明伶仃洋面躉船本係二十二隻今逐回並燒燬折賣之船合而計之轉多於前奏之數蓋因收繳煙土時曾經義律將竄往南澳福建各洋船隻陸續招回此等載煙夷船亦應與躉船一同驅逐故也至應逐奸夷先經臣鄧廷楨奏明者有顛地化淋治打打披三名嗣臣林則徐於嚴驅查噸案內奏明尙有伊弟央噸及其外甥央孖地臣三孖地臣管帳孖地信四名均應驅逐又臣等會同密訪復有應逐之咽義吐噫之皮等連前統共一十六名飭令一併驅逐節據引水人等按日按名查報某夷附搭某船於某月某日開行某日出老萬山外回國上下衙門均有報案現在實已全去此躉船與奸夷均

經驅逐淨盡之情形也。至英夷貨船來粵。先被義律阻留。不令進口。妄思以此挾制。再賣新煙。迨見各口查拏緊嚴。難以圖賣。每於夜間張帆起旋。潛出萬山。經臣等查知。大船已去六隻。小船約十餘隻。其爲將煙載回夷埠。確鑿無疑。是以近日情愿搜查。明因煙已離船。得以放心無恐。惟思夷洋之新嘉坡新埠等處。距粵不過半月海程。安知狡獪奸夷。不將鴉片暫行寄頓。俟此次搜查畢後。再圖偷運而回。所恃以怵其貪利之心者。惟賴有欽頒新例。定以斬絞罪名。自奉到部文。遍行宣示。衆夷咸有戒心。臣等先於收繳煙土之時。卽經飭取生死甘結。該夷堅不肯具。蓋以繳煙係一時之事。尙可藉以求生。而具結乃長遠之事。適恐自陷於死也。然彼所畏懼者在此。則我所以制馭之者。亦正在此。故臣等不敢藉詞中止。亦不敢畏難苟安。相持數月以來。直至逐出澳門。斷其接濟。且值礮擊火燒之後。該夷始愿具結。惟結內但云。如有鴉片。將貨物盡行沒官。而於人卽正法字樣。仍不肯寫。所以臣等前摺奏明。另頒結式。飭令遵照繕繳。當飭印委各員。率同洋商通事傳諭去後。不但義律多方退縮。而且各船船主貨主。併爲一詞。以爲性命攸關。倘有水手私帶些微。恐遭連累。抑或兵役栽贓。誣指難以辯冤。臣等復諭以水手等係夷商應管之人。本宜先自查搜。豈能容其私帶。至查船有官作主。兵役焉敢栽贓。萬一意外遭誣。定予訊明反坐。何庸過慮。總之不帶鴉片。則雖具結。不至加刑。若帶鴉片。卽不具結。亦必處死。多方開導。近日始有該國之變。刺常郎等船。陸續遵式具結。經文武官員於虎門黃埔兩處。分別查驗。實無夾帶鴉片情弊。當卽妥爲帶引。許其開艙。照常貿易。現在統計各國已進黃埔之船。共有四十一隻。且經粵海關監督臣豫堃。驗明各夷船於貨物之外。另帶洋錢來粵買貨。現有一百一十二萬六千餘圓。日後更不止此。似可爲不賣鴉片。

之明證。此後遵式具結者。悉許進口。驗貨貿易。如抗不具結。或結不如式之船。即可毋庸查驗。驅令速回。似此一律飭遵。先使該夷常懷畏死之心。乃足奪其貪利之念。而又嚴之以查驗。密之以偵挈。正經貿易者。加以優待。倘有帶煙發覺。立正刑誅。總惟一意堅持。不因其恫喝刁難。稍爲搖動。庶可永除巨患。至毘林維喜之兇夷。雖據義律稟稱。囚禁五人在船。而既不能審出正兇。又不肯送出聽審。日來並欲解回該國。照依夷例辦理。已飭委員等諭令。斷不准行。大抵該夷於一切事宜。緊一分。則就緒一分。鬆一步。則越畔一步。且其居心叵測。反覆靡常。卽如近日。雖已具稟求誠。而尙有華倫兵船一隻。來自夷埠。名爲護貨。實亦不可不防。臣等仍與提臣關天培。鼓勵水師官兵。靜則嚴防。動則進剿。總不稍示柔弱。務俾悉就範圍。以冀弊絕害除。仰紓宸廑。臣等謹會同廣東巡撫臣怡良。水師提督臣關天培。粵海關監督臣豫堃。合詞恭摺具奏。伏祈皇上聖鑒。謹奏。

林文忠公政書

乙集 使粵奏稿

卷七

會奏穿鼻尖沙嘴疊次轟擊夷船情形摺

奏爲英國貨船正在具結進口。被該國兵船二隻攔阻滋擾。卽經舟師擊逐。逃回尖沙嘴。窺伺陸路營盤。復經我兵據險俯攻。疊次轟擊。將尖沙嘴夷船盡行逐出。不使佔爲巢穴。現只散泊外洋。不敢近岸。臣等仍飭嚴行堵禦。一面綏撫良夷。以示恩威。而安貿易。恭摺奏祈聖鑒。事竊照英夷領事義律前因抗違法度。當經示以兵威。旋據悔罪求誠。已將躉船奸夷盡驅回國。其甘結亦經議具。惟命案尙未交兇。臣等以夷情反覆靡常。雖已具稟乞恩。仍將夷埠兵船暗招來粵。名爲護貨。恐有奸謀。業於前摺奏明。靜則嚴防。動則進剿。不敢稍示柔弱。旋於九月二十八日。由驛遞到回摺。伏讀硃批。朕不慮卿等孟浪。但誠卿等不可畏葸。先威後德。控制之良法也。相機悉心籌度。勉之慎之等因。欽此。又欽奉上諭。當此得勢之後。斷不可稍形畏葸。示以柔弱。雖據該夷領事義律。洵西洋夷目。懇求轉圜。但該夷等詭詐性成。外示恐懼。內存叵測。不可不防。著林則徐等相度機宜。悉力籌畫。如果該夷等畏罪輸誠。不妨先威後德。倘仍形桀驁。或

伴爲畏懼。而暗布戈矛。是該夷自外生成。有心尋衅。旣已大張撻伐。何難再示兵威。林則徐等經朕諄諭。諒必計出萬全。一勞永逸。斷不敢輕率債事。亦不致畏葸無能也。等因。欽此。臣等詭誦之下。仰見我皇上先幾洞燭。訓示嚴明。數萬里外夷情。毫髮難逃。聖鑒。臣等服膺銘佩。遵守彌虔。其特蒙恩賞。呼爾察圖巴圖魯名號。並照例賞戴花翎。以副將卽陞先換頂帶之參將賴恩爵等。感激天恩。益圖報效。凡在將弁士卒。亦皆感奮倍常。提臣關天培。督率舟師。數月以來。常駐虎門。二十里外之沙角礮臺。巡防彈壓。間赴三十里外之穿鼻洋面。來往稽查。近日各國貨船。絡繹具結。俱經驗明。帶進黃埔。英國貨船中。首先遵結者。曰彎刺。亦已進埔貿易。其次遵結者。曰當郎。於九月二十八日正報入口。詎有該國兵船二隻。於午刻駛至穿鼻。其一卽七月內向九龍滋擾之吐密。其一則近來新到之華倫。硬將已具結之當郎貨船。追令折回。不得進口。提臣關天培聞而詫異。正在查究間。吐密一船。輒先開放大礮。前來攻擊。關天培亟令本船弁兵。開礮回擊。並揮令後船協力進攻。該提督親身挺立桅前。自拔腰刀。執持督陣。厲聲喝稱。敢退後者立斬。適有夷船礮子飛過桅邊。剝落桅木一片。由該提督手面擦過。皮破見紅。關天培奮不顧身。仍復持刀屹立。又取銀錠。先置案上。有擊中夷船一礮者。立刻賞銀兩錠。其本船所載三千斤銅礮。最稱得力。首先打中吐密船頭。查夷船制度。與內地不同。其爲全船主宰者。轉不在船尾。而在船頭。粵人呼爲頭鼻。船身轉動。得此乃靈。其風帆節節加高。帆索紛如蛛網。皆繫結於頭鼻之上。是日吐密船頭。撥鼻拉索者。約有數十夷人。關天培督令弁兵。對準連轟數礮。將其頭鼻打斷。船頭之人。紛紛滾跌入海。又奏陞水師提標左營遊擊麥廷章。督率弁兵。連轟兩礮。擊破該船後樓。夷人亦隨礮落海。左右艙口。間有打穿。華倫船

不甚向前。未致受創。接仗約有一時之久。吐密船上帆斜旗落。且禦且逃。華倫亦隨同遁去。我軍本欲追躡。無如師船下旁灰路。多被夷礮擊開。內有三船。漸見進水。勢難遠駛。而夷船受傷。只在艙面。其船旁船底。皆整株番木所爲。且全用銅包。雖礮擊亦不能遽透。是以不值追勦。收軍之後。經附近漁艇撈獲夷帽二十一頂。內兩頂據通事認係夷官所戴。並獲夷履等件。其隨潮漂洶者。尙不可以數計。我師員弁雖有受傷。並無陣亡。惟各船兵丁。除中礮致斃九名外。有提標左營二號米艇。適被礮火落在火藥艙中。登時燃起。燒斃兵丁六名。繼已撲滅。又有受傷之額外黃鳳騰。與受傷各弁兵。俱飭妥爲醫治。此次吐密等前來尋衅。固因前在九龍被擊。意圖報復。而實則由於義律與圖賣鴉片之奸夷。暗中指使。臣等訪知義律於該國煙土賣出一箱。有抽分洋銀數十圓。私邀夷埠兵船前來。以張聲勢。每次送給勞金數至巨萬。到粵後。全船伙食。皆從各貨船湊銀供給。無非恃其船堅礮利。以悍濟貪。臣等併力堅持。總不受其恫喝。所定具結之令。雖據義律勉強遵依。但不肯繕寫人。卽正法字樣。而九月間。復有該國富商數人。至澳門集議。又謂義律但慮人之正法。而各商尤慮貨之沒官。反覆刁難。迄無定議。所喜該國猶有良夷。如彎刺當郎二船。屢諭之餘。頗知感悟。甫與他國夷商一體遵式具結。臣等加意優獎。冀爲衆夷之倡。而義律與該國奸夷。恐此結具後。鴉片絕不能來。遂痛恨該二船之首先遵具。慫恿吐密等兵船。與之尋衅生事。因彎刺已進口內。無可如何。探知當郎入口之時。趕來追捉。適我師在口外彈壓。輒敢開礮來攻。是滋擾雖係夷兵。而播弄實由義律。誠如聖諭。佯爲畏懼。暗布戈矛。自外生成。不得不大張撻伐。經提臣關天培統師攻擊。雖已逃竄不遑。究以師船木料不堅。未便窮追遠躡。則仍須扼其要害。務使可守可攻。查該夷船所

泊之尖沙嘴洋面。羣山環抱。浪靜風恬。奸夷久聚其間。不惟藏垢納汙。且等負隅縱壑。若任其踞爲巢穴。貽患曷可勝言。臣等自嚴斷接濟以來。已於尖沙嘴一帶。擇要紮營。時加防範。本意祇欲其畏威奉法。仍聽貿易如常。原不忍遽行轟擊。而乃抗不具結。匿不交兇。迨兵船由穿鼻被創。逃回。仍在該處停橈修理。實難容其負固。又奚恤其覆巢。節據派防各文武稟稱。尖沙嘴迤北。有山梁一座。名曰官涌。恰當夷船脊背之上。俯攻最爲得力。當卽飭令固壘深溝。相機剿辦。夷船見山上動作。不能安居。乃糾衆屢放三板。持械上坡窺探。卽經駐劄該處之增城營參將陳連陞。護理水師提標後營遊擊之守備伍通標等。派兵截擊。打傷夷人二名。奪槍一桿。餘衆滾崖逃走。遺落夷帽數頂。九月二十九日。夷船排列海面。齊向官涌營盤開礮。仰攻數次。我軍紮營得勢。礮子不能橫穿。僅從高處墜下。計拾獲大礮子十餘筒。重七八斤。至十二斤不等。官兵放礮回擊。卽聞夷船齊聲喊叫。究竟轟斃幾人。因黑夜未能查數。十月初三日。該夷大船。在正面開礮。而小船抄赴旁面。乘潮撲岸。有百餘人。搶上山岡。齊放鳥槍。僅傷兩兵手足。被增城右營把總劉明輝等。率兵迎截。砍傷打傷數十名。刀棍上均沾血跡。夷人披靡而散。帽履刀鞘。遺落無數。次日望見沙灘地上。掩埋夷屍多具。初四日。夷船又至官涌稍東之胡椒角。開礮探試。經駐守之陸路提標後營遊擊德連。將大礮擡礮。一齊回擊。受傷而走。臣等節據稟報。知該處壘被滋擾。勢難歇手。當又添調官兵二百名。派原任遊擊馬辰。暨署守備周國英。把總黃者華。帶往會勦。復思該處既占地利。必須添安大礮數位。方可致遠攻堅。復與提臣挑撥得力大礮六門。委弁解往。以資轟擊。並派熟悉情形之候補知府南雄直隸州知州余保純。帶同候補縣丞張起鵬。馳往會同新安縣知縣梁星源。相度山梁形勢。妥爲佈置。

復札駐守九龍之參將賴恩爵。都司洪名香。駐守宋王臺之參將張斌。亦皆就近督帶兵械。移至官涌併力夾擊。茲據會稟。十月初六日。該文武等均在官涌營盤會同商定。諸將領各認山梁。安設礮位。分爲五路進攻。陳連陞。伍通標。張斌。各爲一路。賴恩爵及馬辰。周國英。黃者華。爲一路。德連。洪名香。爲一路。該縣梁星源。管帶鄉勇。前後策應。晡時夷人在該船桅上。窺見營盤安礮。卽各趕裝礮彈。至起更時。連放數口打來。我軍五路大礮。重疊發擊。遙聞撞破船艙之聲。不絕於耳。該夷初猶開礮抵拒。迨一兩時後。只聽呀啞叫喊。竟無回擊之暇。各船燈火。一時滅息。棄旋潛逃。初七日天明。瞭望約已逃去其半。有雙桅三板一隻。在洋面半沈半浮。餘船十餘隻。退遠停泊。所有篷扇。桅檣。繩索。槓具。大都狼狽不堪。該文武等。因夷船尙未全去。正在查探間。卽據引水等報稱。查有原扮兵船。在九龍被礮打斷手腕之得忌刺吐。及訪明林維喜命案。係伊水手逞兇之多利兩船。尙欲潛圖報復。該將領等。因相密約。故作虛寂之狀。待其前來窺伺。正可痛勦。果於初八日晡時。多利併得忌刺吐兩船。潛移向內。漸近官涌。後船十餘隻。相隨行駛。我軍一經瞭見。仍分起趕赴五路山梁。約計礮力可到。卽齊放大礮。注定頭船。攻擊。恰有兩礮。連打多利船艙。擊倒數人。且多落海漂去者。其在旁探水之夷划一隻。亦被擊翻。後船驚見。卽先折退。而多利一船。尤極倉皇遁去。無暇回礮。計官涌一處。旬日之內。大小接仗六次。具係全勝。惟初八日晚間。有大鵬營一千斤大礮。放至第四出。鐵熱火猛。偶一炸裂。致斃順德協兵丁二名。除與穿鼻洋面。陣亡兵丁。及受傷兵內。如有續故者。一體咨部請卹外。現據新安縣營稟。據引水探報。吐密華倫兵船。義律三板。暨英夷未進口大小各船。自尖沙嘴逃出後。各於龍鼓管洲。赤瀝角。長沙灣等處外洋。四散寄泊。查粵省中路各洋。爲漢夷

通商總道。雖皆可許泊舟。亦須察看形勢。隨時制馭。卽如道光十四五年間。夷船藉稱避風。輒泊金星門。該處地屬內洋。不得任其逼處。經臣鄧廷楨嚴行驅逐。至今不敢進窺。年來改泊尖沙嘴。祇於入口之先。出口之後。暫作停留。尙無妨礙。今歲佔泊日久。儼有負固之形。始則抗違。繼且猖獗。是驅逐由其自取。並非畔自我開。此次剿辦之餘。於澳門既不能陸居。於尖沙又不能水處。苟知悔悟。儘許回頭。若義律與吐密等。尙以報復爲心。則堅壘固軍。靜以待之。亦自確有把握。不敢輕率畏葸。致失機宜。至貿易一事。該國之國計民生。皆繫於此。斷不肯決然捨去。若果英夷憚於具結。竟皆歇業不來。正米利堅等國之人所禱祠。而求冀得多收此利者。與其開門揖盜。何如去莠安良。而良莠之所以分。卽以生死甘結爲斷。臣等現又傳諭諸夷。以天朝法紀森嚴。奉法者來之。抗法者去之。實至公無私之義。凡外夷來粵者。無不以此爲衡。並非獨爲英吉利而設。此時他國貨船。遵式具結者。固許進埔。卽英國貨船。亦不因其違抗於前。而並阻其自新於後。又如英國彎刺之船。已在口內。聞有穿鼻官涌之役。難免自疑。臣等諭令地方印委各員。諄切開導。以伊獨知遵式具結。查明並無鴉片。洵屬良夷。不惟保護安全。且必倍加優待。復經海關監督臣豫堃。親至黃埔驗貨。特傳彎刺。面加慰諭。該夷感激涕零。惟當郎一船。被吐密嚇唬之後。尙未知避往何處。臣等飭屬查明下落。護帶進埔。尙吐密兵船。復敢阻攔。仍須示以兵威。總期悉就範圍。仰副聖主綏靖華夷之至意。現在沿海閭閻。照常安貼。堪以上慰宸懷。所有現辦情形。謹會同廣東巡撫臣怡良。水師提督臣關天培。粵海關監督臣豫堃。恭摺具奏。伏乞皇上聖鑒。謹奏。

會奏察看英夷反覆情形。遵旨不准交易摺。

奏爲察看英夷反覆情形。仍爲圖賣鴉片起見。遵旨不准交易。俾知儆懼。並以折服各國夷情。恭摺奏祈聖鑒事。竊照英吉利國貨船。於九月底。正在具結進口。旋被該國兵船二隻。攔阻滋擾。我兵水陸疊擊。將該兵船及尖沙嘴各夷船。盡行逐出外洋。經臣等於十月十六日。恭摺具奏在案。嗣承准軍機大臣字寄。九月二十三日。奉上諭。前後駛回各船。難保不潛赴東西兩路。冀圖私銷。著卽派員跟蹤偵察。嚴飭沿海各營。認真防範。至所出切結。如果可靠。自必漸就肅清。儻該夷迫於勢蹙。暫作緩兵之計。日後再有反覆。卽當示以兵威。斷絕大黃茶葉。永遠不准交易。俾冥頑之徒。知所儆懼等因。欽此。臣等跪讀之下。仰見我皇上料夷情之反覆。示儆懼於冥頑。訓諭周詳。彌深欽服。查臣等先於收繳煙土事竣。當以此後不許夷人再賣鴉片。理應取其遵依。是以飭繕甘結。聲明如有夾帶鴉片人。卽正法。貨物沒官字樣。義律先本抗違。迨數月相持。屢經挫折。八月內始據稟稱。情愿具結。惟所寫字樣。尙與新例不符。臣等念其畏罪輸誠。冀可再加開導。是以將其原遞澳門同知說帖。繕錄奏聞。詎該夷陽奉陰違。早不出聖明所料。至九月間。義律復招夷商數人。在澳門集議。彼此推卸刁難。此卽反覆之始也。該國有彎刺當郎二船。均遵式具結。彎刺先進黃埔。而當郎船正在入口。被義律潛約吐密兵船。將其攔回。以致與師船互相礮擊。其爲反覆莫甚於此。且前遞說帖內云。毆斃林維喜命案兇手。已懸賞二千圓。令人報知。至九月底。乃將囚禁在船之夷人五名。均欲解回該國。照夷例辦理。是其反覆之形。不一而足。而究其所以反覆之故。實因慣賣鴉片。奸夷利心不死。前雖已將新煙帶回夷埠。而往來夥黨尙多。仍思乘機偷運。伊恐甘結一具。性命難逃。而義律利其抽分。與之朋比。忽恭忽倨。皆有譎謀。臣等前已傳諭諸夷。奉法者來之。抗法者去之。英夷既

不遵約束。與其開門而揖盜。何如去莠而安良。茲蒙訓諭嚴明。尤當恪遵辦理。當卽函商粵海關監督臣。豫堃會同出示曉諭。自十一月初一日起。停止英吉利國貿易。除未經停止以前。英夷有將貨物轉賣與別國夷商者。既據遵式具結。查無鴉片。卽係正經貿易。業已移步換形。尙可不追既往。當與彎刺等一體准令進口外。其餘責成洋商。認明英國來船。一概停其交易。所有大黃茶葉二物。查大黃每年出口。本屬有限。不過附搭藥材項下。英夷所銷尤少。惟茶葉在所必需。然有綠茶黑茶之分。英夷所銷多係黑茶。現在嚴密稽查。不使影射偷漏。查向來夷船到粵。以英吉利爲最多。自嚴辦鴉片以來。各夷埠均有傳聞。以鴉片出自英國。此後該國買賣可減。別國買賣可增。如連國、瑞國、及單鷹、甚波立等國。歷年不過偶來一二船。本年來者特多。是他夷皆有欣欣向榮之象。而米利堅國之船。現來四十五隻。則比往屆全年之數。已有浮多。尤見天朝聲教覃敷。並不少此英吉利一國。而義律之勾結吐密等。虛張僑飾。玩法營私。該國以七萬里之遙。其主若臣。未必周知情狀。今他國通商如舊。而英國獨停。若該國查察情由。係因圖賣鴉片。抗違天朝新例。則內而自知理曲。外而顏面何存。彼亦不肯容義律等之詭計奸謀。以自壞其二百年來之生計也。伏思斷絕鴉片。首貴杜其來源。而杜源總在夷船。無他謬巧。譬之防守河工。鴉片之來。如黃水。然惟有嚴隄防以禦之。紋銀之出。如清水。然惟有閉牖壩以束之。本年以來。收繳已化之煙土。值銀千餘萬兩。人所共知。而新來之鴉片。半途聞信折回。及到粵。畏挈運回者。訪聞亦復稱是。故本年英夷來船。本較往年爲少。今既發令斷絕該國貿易。所有洋商行鋪。均不敢與之私售。惟當視其有無悔懼真情。再行覈辦。至他國遵照具結。進口查無鴉片者。已有船六十二隻。並據查報。帶來洋錢。將及二百萬圓。臣等

仍當時刻稽查。防其潛代英夷走私偷賣。不敢因他夷之遵式出結。卽遽信爲無他。其先已具結之當卽一船。雖係英國夷人。而早知遵循法度。現被義律等扣留口外。日後若求入口。仍當帶進黃埔。不宜與觀望營私之他船一例辦理。以示區別。至前後駛回各船。誠難保不潛赴東西兩路。希冀私銷。臣等仍遵諭旨。密派文武跟蹤偵察。並嚴飭沿海各營。認真防範。總期該夷鴉片無處可售。庶使海面肅靜。以仰副聖主除患保民之至意。所有現斷英夷貿易緣由。謹會同廣東巡撫臣怡良。水師提督臣關天培。粵海關監督臣豫堃。合詞恭摺具奏。伏乞皇上聖鑒訓示。謹奏。

會奏請將高廉道暫駐澳門查辦夷務片

再臣等伏讀上諭。林則徐已放兩江總督。現雖專辦此事。豈能常川在粵。卽鄧廷楨統轄兩省。公務繁多。亦不免顧此失彼。仍當通盤籌畫。辦理結實。俾日後淨絕根株。方稱一勞永逸等因。欽此。仰見聖主明示機宜。曲體臣工之至意。現已遵旨斷絕英夷交易。由虎門起程回省。籌辦善後事宜。竊念徒法不能自行。而量材或堪器使。自當擇其扼要。俾有治人。查各國夷商來粵貿易。貨船俱進黃埔。而坐莊商夥。多僑居澳門。探行市。清帳目。固在此。而操奇贏。通詭祕。亦在此。是澳門實爲總匯之區。狡窟旣多。漢奸因之麀集。教獠升木。靡所不爲。至西洋夷人。雖稱恭順。而不耕不織。專恃懋遷。罔利之謀。變幻百出。現經停止英夷交易。更難保其不私相串囑。代運代銷。弊竇一開。漏卮依舊。不可不大爲之防。溯查雍正八年。設香山縣丞一員。駐劄澳內之望廈村。乾隆八年。又設澳門同知一員。駐劄距澳十五里之前山寨。專司夷務。布置本極周詳。惟近日夷人變詐多端。澳務愈形喫重。當此認真釐剔之際。控馭尤貴得人。必須官職較大之

員。方足以窮資源。而制驕縱。查有新授高廉道易中孚。儉約自持。能耐勞苦。辦事勇敢。頗著威名。現已交卸潮州府篆。卽赴高廉新任。臣等公同商酌。擬卽委令該道暫行駐劄澳門。督同澳門同知等。查辦夷務。舉凡稽察澳夷額船。斷絕英夷冒混。緝拏漢奸接濟。一切責成該員。董率辦理。其高廉道本任政事較簡。儘可包封在澳覈辦。惟高廉兩郡秋審。向由該道提勘。屆期前往。不過月餘。卽可竣事。至澳內棲止之處。舊有粵海關監督行署一所。係屬空閒。可借與該道駐劄。以資辦公。惟澳門華夷雜處。布惠尤貴宣威。小事修刑。大事修戎。實爲事所時有。旣經畀以事權。卽當予以兵衛。查前山寨設有內河水師都司一員。帶兵三百六十三名。向歸香山協管轄。應請由該道節制。遇有緩急。聽其調遣。高廉道本兼兵備。體制亦屬相符。俟整頓一二年後。如果諸夷就範。鴉片肅清。再將該道撤回高廉。以重職守。臣等愚昧之見。是否有當。謹會同撫臣怡良。附片奏祈聖鑒。謹奏。

林文忠公政書

乙集 使粵奏稿

卷八

覆奏遵旨體察漕務情形通盤籌畫摺

奏爲遵旨體察漕務情形通盤籌畫恭摺覆奏仰祈聖鑒事。竊臣承准軍機大臣字寄。七月初四日奉上諭。前據金應麟奏請將漕運事宜量爲變通。已有旨交兩江總督江蘇巡撫等妥議具奏矣。著陳鑾裕謙卽將原奏內所指各情節體察情形通盤籌畫。仍俟林則徐到任後再行會商務臻妥善據實具奏。將此諭令知之。欽此。臣因奉差在粵未見金應麟原奏請俟江蘇省將原奏咨到卽當體察籌議先於八月內附片奏聞在案。嗣准署江蘇巡撫布政使臣裕謙鈔錄金應麟原奏移咨到粵。臣細閱奏內所陳查辦六條處分一條皆辦漕切要之事自應大加整頓力挽積疲而其附片探訪見聞亦不得已而求變通之法。惟是漕務勢成積重如醫家之治久病見證易而用藥難。蓋他端政事祇求官與民兩相安而已。獨漕務則糧戶輸之州縣州縣兌之旗丁而旗丁領運於南斛交於北則又有沿途鬧壩與通倉經紀操其短長故弊常相因而事難獨善卽論病根所起南北亦各執一詞以北言南則謂州縣浮收以致旗丁勒索旗

丁勒索。以致到處誅求。而以南言北。又謂旗丁既被誅求。安得不勒索。而州縣既被勒索。安得不浮收。每以反脣相稽。鮮能設身處地。於是官與民競。丁與官競。卽官與官。亦各隨其職掌。以顧考成。而無不相競。而凡刁生劣監。訟棍包戶。奸胥蠹役。頭伍尖丁。走差謀委之徒。亦皆乘機挾制。以衣食寢處於漕。本圖私也。而害公矣。本爭利也。而交病矣。原奏謂近年州縣。臨漕規避。挾制上司。莫可誰何。此亦難免之事。蓋寬之固不啻教猱升木。卽嚴之亦不過掩耳盜鈴。各處類然。而蘇松爲尤甚。蘇松之漕果治。則他處當無不治。臣前在蘇省。雖歷五次冬漕。祇求無誤。正供實不敢言無弊。茲奉諭旨飭議。謹憶往時所歷情形。與原奏互相參酌。分擬四條。或正本清源。或補偏救弊。或爲補救外之補救。或爲本源中之本源。近則先計一時。遠則勉圖經久。不揆固陋。謹逐條另繕摺。恭呈御覽。伏候聖裁。惟差次未帶案卷。竊恐記憶舛訛。如蒙聖明採擇。可否發下署兩江總督臣陳鑾。署江蘇巡撫臣裕謙。覈對案據。並將本屆冬漕。有無堪以照辦之處。斟酌具奏。請旨定奪。是否有當。謹繕覆奏。伏乞皇上聖鑒訓示。謹奏。謹將籌議漕務四條。繕具清摺。恭呈御覽。

一議正本清源。必使自南至北。皆無例外苛求。然後可以杜州縣之浮收。絕旗丁之勒索。要不能專禁一處。故其事極難。然果法在必行。則亦不敢因難而阻也。臣竊擬一簡便之法。曰縣督幫收。緣州縣一經開倉。則逐日用度。不勝枚舉。不獨幫費繁重已也。與其進倉出倉。時日耽延。耗費無算。何如合收兌爲一事。就糧船爲倉廩。查每年重運過後。本次總有減歇。及屆造之船。先令依限修造。一經開漕。先以此船收米。回空到後。速催修艙。接續貯收。收完一船。卽取一船。關結。先開離次。州縣於岸上搭蓋篷廠。令

花戶斛米交船丁與民相授受。而官監之。務使平斛響攬。顆粒不得浮加。其米色之高低。胥由州縣持平。不任旗丁欺壓。蓋在官既無濡染。則理直氣壯。卽禁止令行。不但旗丁無敢刁難。卽索規包抗之徒。皆可執法從事。而小民胥免浮折徵收。可決公平矣。惟就中窒礙者有三。一則春篩白糧。採買糯米。一切夫工折耗。口袋麻繩。向由州縣津貼。一則逃亡絕戶。廢地老荒。向由州縣墊補。一則票冊紙張。夫役飯食。篷廠薪燭。向由州縣措辦。一收新漕。皆無從挹注。但能責州縣以潔己。不能責州縣以解囊。卽幫費不花一錢。而虧漕悞運之患自若。沉重船不能不脛而走。又人所共知者乎。不得已仍仿成法。而變通之。溯查丁代民勞之始。每石原有耗米六斗六升。辦運極爲充裕。嗣將耗米劃出四斗。起運歸公。其餘二斗六升。折徵銀一錢三分。由糧道批解倉場衙門。以充支放公用。故有二六輕齋之名。而丁不與焉。又有篩颺耗米一款。每石給二升七合有零。專以貼丁。嗣則奏准米歸通倉。其貼丁之款。由縣折銀支給。復有漕贈一款。正耗二米。每石贈銀一錢。改兌之米。每石贈銀五分。原由糧戶津貼旗丁。故謂之贈。迨後此款內。每石劃出二十七文。分給北壩。名曰箇兒錢。又於雍正七年。前大學士尹繼善奏准革除江蘇漕弊。每米一石。津貼銀六分半。歸旗丁半。歸州縣。近聞此款。專歸丁收。凡此皆貼漕之大略。或載全書。或見部案。班班可考。今果力辦清漕。似須統核倉場經紀。以及旗丁州縣。每處應得漕務款項。實有若干。其用度萬不可少者若干。徹底查明。通盤籌畫。凡有可以取資之款。各支各用。彼此不許侵剋。其實在無從設措者。卽不得不參酌成法。仍著糧戶貼銀。蓋完米既顆粒無浮。則糧戶受益不少。而縣幫辦公掣肘之處。糧戶亦無不周知。從前中外條陳。每有八折收漕之議。事多流弊。自不可行。若仿

尹繼善奏准章程。參考歷來成案。比較現在情形。則每石酌貼銀三四錢。似亦不詭於正。可否責令各府州。細加察看。由司道議詳督撫。分別奏明。予以限制。將大小戶一律徵收。比之目下完漕。定可減輕過半。如縣幫再有婪索糧戶。再有抗延。以及後手之尖丁。白規之生監。惟有儘法痛辦而已。雖然。疲幫軍船。不得不裁汰也。查江淮興武二幫。因無屯田。疲名久著。然尙有造費貼息。其最不堪者。如太倉後幫。滁蘇幫。太河二三幫。債積巨萬。船壞八九。不調劑不能出運。卽調劑亦無完膚。且孤寡廢疾之流。皆其債主。沿河攔索。以累百計。故津貼到手。卽罄。而開行數里。卽停。索債者認船不認人。謂之黑帳。惟船去然後債去。雖定例各幫額船。不許缺少。然負重灑帶。雇募買補。與夫加一免雇。亦例內所許通融者。與其強留之。而各幫效尤。何如酌減之。而米歸灑帶。抑或減疲幫之額。以添般幫之船。似宜責成糧道。體察辦理。勿以原額拘之。庶可悉歸完善矣。雖然。閘壩關纜。不得不酌減也。查重運挽過清江浦。向稱三閘五壩。每船關纜夫錢。不過十餘千。至二十餘千爲止。嗣因清江一閘。亦難挽放。而臨黃各壩。復有加添。道光二年前。漕臣李鴻賓所定木榜。則稱四閘九壩。近年復加至十四壩。每處關纜。皆以頭二三進爲差。年增一年。每船渡黃。需錢百餘千。至百數十千不等。固由水勢湍急。而夫頭之乘危勒索。委員之暗地分肥。薄人於險。實爲可惡。欲除其弊。先須大減委員。留一二實心者。專其責成。以每日所放船數。分勤惰。以所放之有無失事核功過。其壩座設法減少。關纜夫錢。悉定其數。刊榜曉諭。此外沿途各閘。亦皆照行。如有訛詐。立置於法。似可以杜其弊。雖然。候補衛弁。不得不甄別也。捐納衛官。分發到淮。圖差使者。無非圖規費耳。從前自南而北。漕委不過二十餘人。迨道光七年。奏定重運。不得過四十

員回空不得過二十八員。至十六年。又有不得過八十員之奏。總由候補人衆。難令空閒。然與其調劑而累丁。何如酌留而汰冗。或量其膂力。改補營職。或按其捐數。量改佐雜。似亦可以疏通矣。雖然。通倉使費。不得不核實也。查通倉經紀。以米爲生。凡米之好醜。斛之贏縮。俱不難隨手改移。故費足。則稅稗亦珠璣。費不足。則釜鍾當升合。不獨旗丁。惟命是聽。卽各省糧道。恐亦莫可如何。惟賴本管官爲之裁制而已。查糧船有帶北存公一款。本係從幫費內劃出。以爲壩費。聞近年存公款銀。每不敷用。以致壩債愈多。則累丁之故可想。似宜准令各幫旗丁。於抵通交米後。將經紀有無勒索。稟知該管糧道。卽由道彙取丁結。逕揭部科一次。如有指出贓款。准予查辦。按實者。實之重典。或可互相鈐制。至賦出於田。理宜清丈頃畝。以除寄莊飛灑之弊。丁起於屯。理宜稽核衛地。以裕貼造贍運之資。此亦本源之所應治。而不能期諸旦夕。似當從容以理之者也。

一、議補偏救弊。漕務已成積重。若一時不能驟改。亦須補救有方。金應麟原奏所陳。本已詳悉。茲臣所議。有於原奏中融會者。有於原奏外推詳者。在縣在幫。各有六事。一則核舊章。以去太甚也。查蘇松糧戶。向分大小。而收數因有短長。大戶愈占便宜。則小戶愈受苛刻。彼此相較。有數十等之差。於是小戶效尤。亦詭寄於大戶。而辦漕愈難矣。今雖未能遽令畫一。斷不可過於偏枯。該管府州耳目切近。應令確查所屬州縣。歷年收兌舊章。援以爲準。不及者。曲在民。太過者。曲在官。隨地隨時。持平核辦。至近年祠堂公產。假託者多。卽義產息田。亦竊善舉之名。以遂短漕之計。應令散歸各戶。照衆徵完。以杜影射。有挾制者。罪之。總以去其已甚爲主。一則治經造。以除弊匿也。查近歲完漕。不但徵新。且多帶舊。其中分

年分限。各屆完數不同。民間要見由單。始可照數完納。而闔縣糧戶。多者數十萬。少亦十數萬。一切完帶之數。瑣碎零星。官吏難以周知。不得不假手於里甲莊差。統名謂之經造。而若輩居爲奇貨。不以實徵戶冊與官。不以易知由單與民。私折暗包。以完作欠。迨至兌漕緊急。硬將短數交官。而加貼之多。早經肥己。遲悞把持。莫此爲甚。應令州縣於開漕之先。速將由單散給。並將給單日期。出示通諭。各糧戶如五日内。單未到手。許控經造。若單到手。而不完納。另差查催。倘已由經造折收。匿不稟官者。一經發覺。立辦重罪。一則清訟米。以杜抗延也。查收漕之事。固少持平。而告訐之人。總非善類。無糧而上控。則索規可知。有糧而上控。則躲避可知。控案固須審明。正供豈容藉抗。應將上控之糧戶。由赴訴衙門。押令到倉交完。本名下米石。始行准理。一則稽丁胥。以憑懲蠹也。查漕書記書倉差斗級。以及管倉管廩家人。皆不能不用。若輩莠多良少。非魚肉百姓。卽侵盜本官。飛串灑米。搬戶掛籌等弊。難以枚舉。甚且結尖丁。而分肥於後手。引訟棍。而調處以居閒。破案卽逃。浮蹤莫捉。應先責令州縣。將此等的實姓名。年貫住址。並其家屬親丁。詳列冊內。送該管府州覆查。一有弊端。立即提究。如查造不實。提挈不到。惟該州縣是問。至總運廳差。亦須裁減。並永禁坐倉。以免勾結滋弊。一則嚴截串。以杜豫虧也。州縣關葺之員。閒有漕前。先截板串。或挪解下忙錢糧。或墊辦修倉鋪底。其串或給書差。或付錢鋪。無非明虧暗損。挖肉補瘡。至臨漕而無所措手矣。更有不肖之員。暫時署事。將值交卸。趕將善區美戶。截串先徵。此爲營私悞公之尤。必須重辦。一則消漕尾。以實庫貯也。江蘇漕額之大。有一縣而可抵湖南北一省者。漕船催開緊急。斷不能守待闔縣疲戶。一律全完。故州縣墊漕。萬不能已。所謂漕尾是也。惟其特有現

存未徵之串。得交後任接徵。而後任又以新屆錢漕爲亟。未遑兼顧。一輟轉開。舊串流交。久之幾成廢紙。應責令州縣。按年分月帶徵。二成徵不足者。著賠。則雖往復乘除。總無五年以外之漕尾。而庫款庶免虛懸。至有一種取巧。州縣將短縮太甚之大戶。故意不徵。留作漕尾移交者。察出特參。與大戶一同懲辦。庶可示儆。此在縣之六事也。其在幫者。亦有六事。一則復冬兌。以符價限也。查漕船例應冬兌冬開。嗣因節節爲難。不能悉符舊制。近年疊奉諭旨。統限四月初十以前。全數費至清江。渡黃北上。定須懷遵。欽限不得刻逾。但冬間若不多兌。春間必不能早開。而旗丁慣以米色爲詞。停兌議費。且其意欲令米石在縣倉發熱過後。始行上船。故兌愈疲而費愈重。漕亦愈遲。嗣後冬間。須儘縣中所收之米。全行兌幫。不得任丁刁措。庶來春祇須找兌。差可速漕矣。一則按兌米。以給津貼也。幫費卽不能遽裁。而頻歲疊加。何以爲繼。惟當欽遵嘉慶二十二年九月所奉諭旨。統以米石多寡。按水次舊章。酌給津貼。作爲一定限制。如再格外需索。卽當治罪。而給付之法。總惟兌一石之米。給一石之費。如兌多給少。不依州縣。給多兌少。不依旗丁。有逐日兌單爲憑。自足以昭公允。至於未兌以前。責在州縣。旣兌以後。責在旗丁。歷奉諭旨。嚴明定須敬謹遵守。若兌竣之後。勒指通關。及空船先開。隨後趕米。皆旗丁誤漕大弊。必須重治其罪。一則別虛船。以昭核實也。查加一免雇。及輪減存次之船。並不受兌出運。而仍給與行月。苦蓋已屬格外從優。豈得復爭津貼。應查照從前奏案。此項虛船。不准混索幫費。致全幫延緩開行。如違卽當嚴辦。一則實行月。以防正虧也。查旗丁行月米糧。皆計口授食之需。升合不容短少。乃近聞縣幫串合折乾。每船有折米數十石。及百餘石不等。獨不思沿途食米不足。致虧正糧。誰執其咎。嗣

後水次。如有此弊。縣幫一體治罪。一則懲水手。以節身工也。糧船水手有額。雇在船者。有遊幫短絳者。總之皆兇狠之徒。或師傅盤踞老堂。或頭船勒薦夥黨。偶遇風水阻滯。卽藉端勒加身工。甚至毆丁折。船大爲幫累。近年疊經嚴辦。略見斂戢。嗣後如有勒加身工之水手。卽於所在地方。儘法懲創。不稍姑息。毋使旗丁被累。方免悞公。一則定輪開。以齊跨兌也。蘇松等屬。向有調幫章程。原使酌劑均平。而船數米數。不能恰合。故一縣之米。有兼兌數幫者。一幫之船。又有跨兌數縣者。與其按縣全開。不如按幫爲便。應飭糧道。排定日期。每縣先輪一幫開行。週而復始。其跨兌者。合輪數縣。遂齊一幫。以免參差。似亦可以速漕利運。此在幫之六事也。

一、議補救外之補救。查原奏片稱。兌費斷不能減。南糧恐不能來。有謂宜於糧船大修時。將船改小。以一分二。卽免剝費開費。有謂宜於淮上建廠貯米。卽令小船運京。有謂宜令蘇松常鎮杭嘉湖等府。逐年試辦海運。仍將兌費提存藩庫。此三者皆不得已而求變通之法也。臣查中途建倉。以利轉盤。與古之洛口倉相仿。本係成法。但核計一廠貯米約五六百石。大者亦止千石。以南漕四百萬石計之。每廠貯一千石。卽須廠座四千。就令減半轉運。二千廠亦不可少。經費殊覺浩繁。且淮上逼近河湖。亦恐難以擇地。若糧船以一分二。過閘旣覺輕靈。遇淺又免盤剝。誠利運卹丁之善策。然查南漕起運之船。約有四千隻。其中本已區分大小。江廣之船最大。浙次之。蘇又次之。緣江廣重運。直下長江。小船難禁風浪。若江浙之船改小。而江廣不改。則閘河磨淺起剝。仍費周章。且卽江浙之船。所載正漕。照例只四百石。此外則爲加載負重。而又有例准攜帶土宜。自不能強小船以受大船之載。若因改船而船數驟加一

倍。是欲去累而累轉增矣。且大修較之折造。例限尙隔三年。領項亦少三分之一。當大修而令其折造。丁必藉口抗延。尙有未屆大修者。尤不能一律勒改。是一幫之船。有大有小。旣難稽核。而剝費亦所省無幾。是以臣未敢輕議更張也。竊謂三者之中。惟海運曾經辦過。尙有成案可循。若按候放洋。得乘南風北駛。春夏二季中。一船必可兩運。如以涉險爲慮。則沙船往來。關東每歲以數千計。水線風信。皆所精熟。祇令裝載六七分。已合鬆艙之數。則風暴無虞也。如慮米石出洋。易滋影射。查南北洋面。沙船烏船。各有所宜。本難越駛。尙恐萑苻竊發。自應護以舟師。且每歲沙船所運。關東豆石雜種。不知凡幾。奚獨於載米而疑之。海運若行。或以官運。或以商運。或運正供額漕。或運採買米石。尙當細酌情形。另行從長計議。惟原奏有將兌費。提存藩庫。以實庫項之議。查道光六年辦理海運。雇募沙船。每石給價七錢。若兌費另提。則雇資安出。且旣明提兌費。又奚能禁止浮收。如謂輪年提費補虧。正恐一年提存。難補節年虧缺。若提者自提。虧者自虧。於事仍恐無濟。大抵海運尙屬可行。而所以行之者不同。設或規費漸增。亦與河運奚擇。惟現在河運甚形棘手。未卜日後如何。而海道直捷易通。亦不敢不豫留地步。如蒙飭令議行。容臣到兩江之任。再與江蘇撫臣及司道等。詳細籌商。會同具奏。請旨定奪。理合聲明。

一、議本源中之本源。臣愚竊維國家建都在北。轉粟自南。京倉一石之儲。常糜數石之費。奉行旣久。轉輸固自不窮。而經國遠猷。務爲萬年至計。竊願更有進也。恭查雍正三年。命怡賢親王總理畿輔水利。營田不數年。墾成六千餘頃。厥後功雖未竟。而當時效有明徵。至今論者。慨想遺踪。稱道勿絕。蓋近畿水田之利。自宋臣何承矩。元臣托克托。郭守敬。虞集。明臣徐貞明。邱濬。袁黃。汪應蛟。左光斗。董應舉。輩歷

歷議行。皆有成績。國朝諸臣。章疏文牒。指陳直隸墾田利益者。如李光地。陸隴其。朱軾。徐越。湯世昌。胡寶瑤。柴潮生。藍鼎元。皆詳乎其言之。以臣所見。南方地畝。狹於北方。而一畝之田。中熟之歲。收穀約有五石。則爲米二石五斗矣。蘇松等屬。正耗漕糧。年約一百五十萬石。果使原墾之六千餘頃。修而不廢。其數卽足以當之。又嘗統計南漕四百萬石之米。如有二萬頃田。卽敷所出。倘恐歲功不齊。再得一倍之田。亦必無虞短絀。而直隸天津河間永平遵化四府州。可作水田之地。聞頗有餘。或居窪下。而淪爲沮洳。或納海河。而延爲葦蕩。若行溝洫之法。似皆可作上腴。臣考宋臣鄆。齊喬之議。謂治水先治田。自是確論。直隸地方。若俟衆水全治。而後營田。則無成田之日。前於道光三年。舉而復輟。職是之故。如仿雍正年間成法。先於官蕩。試行興工之初。自須酌給工本。若墾有功效。則花息年增一年。譬如成田千頃。卽得米二十餘萬石。或先酌改南漕十萬石。折徵銀兩解京。而疲幫九運之船。便可停追十隻。此後年收北米若干。概令覈其一半之數。折徵南漕。以爲歸還原墾工本。及續墾佃力之費。行之十年。而蘇松常鎮太杭嘉湖八府州之漕。皆得取給於畿輔。如能多益善。則南漕折徵。歲可數百萬兩。而糧船旣不須起運。凡漕務中例給銀米。所省當亦稱是。且河工經費。因此更可大爲樽節。上以裕國。下以便民。皆成效之可卜者。至漕船由漸而減。不慮驟散水手之難。而漕弊不禁自除。絕無調劑旗丁之苦。朝廷萬年至計。似在於此。可否飭下廷臣。及直隸總督。籌議酌辦之處。伏候聖裁。

會奏遵旨宣布英夷罪狀並設法驅逐該國船隻出口摺

奏爲英夷於禁斷貿易之後。旋又具稟乞恩。經臣等嚴行批駁。堅與之絕。現復欽遵諭旨。列其罪狀。宣布

各夷並設法驅逐該國船隻出口。恭摺奏祈聖鑒事。竊臣等於十一月二十九日承准軍機大臣字寄。奉上諭。林則徐等奏。轟擊夷船情形一摺。覽奏均悉。英吉利國夷人自議禁煙之後。反覆無常。前次膽敢先放火礮。旋經劉諭偽作恭順。仍勾結兵船潛圖報復。彼時雖加懲創。未卽絕其貿易。已不足以示威。此次吐密夷船復敢首先開放大礮。又於官涌地方占據巢穴。接仗六次。我兵連獲勝仗。並將尖沙嘴夷船全數逐出外洋。該夷心懷叵測。已可概見。卽使此次出具甘結。亦難保無反覆情事。若屢次抗拒。仍准通商。殊屬不成事體。至區區稅銀。何足計論。我朝撫綏外夷。恩澤極厚。該夷等不知感戴。反肆鴟張。是彼曲我直。中外咸知。自外生成。尙何足惜。著林則徐等酌量情形。卽將英吉利國貿易停止。所有該國船隻。盡行驅逐出口。不必取其甘結。其毆斃華民兇犯。亦不值令其交出。當卽一船無庸查明下落。並著出示曉諭各國。列其罪狀。宣布各夷。俾知英夷自絕天朝。與爾各國無與。爾各國照常恭順。仍准通商。倘敢包庇英夷。潛帶入口。一經查出。從重治罪。其沿海各隘口。並距夷埠不遠之各海島。均著林則徐等相度機宜。密派員弁兵丁。嚴加防護。毋稍疎懈。等因。欽此。臣等跪讀之下。仰見我皇上乾綱獨斷。震疊諸蕃。訓示嚴明。俾有遵率。下忱感慄。莫可名言。當卽恭錄諭旨。咨會提臣關天培。欽遵辦理。伏查英夷自呈繳煙土以後。種種違玩。反覆無常。總因賣煙奸夷。冀留後路。若使稍爲寬假。適足墮其詭謀。是以商同定議。欽遵前奉諭旨。自十一月初一日起。停止該國貿易。業於十一月初九日具奏在案。嗣於十一日。該夷義律遣人前赴沙角礮臺。向提臣呈遞夷稟一件。由提臣咨送前來。臣等公同拆閱。內稱實心欲求承平。無不肅敬。天朝律例。又稱茲時所求。惟欲仍作正經貿易。凡事欽遵大清律例等語。雖欲明其奉法。究係一片空言。臣

等度其此次具稟懇求仍不過如八月間僞作輸誠伎倆當以現今奏明封港不與爾國交易皆由爾之自取並非天朝無故絕人爾不悔悟於前此時懇求已晚等語嚴切批示仍咨會提臣飭令提標中軍遣令引水傳諭去後復思英夷貨物久貯在船易於壞爛今聞停止貿易竊恐影射圖銷而各國夷商利其運腳抽分難保不無私行夾帶又經嚴諭洋商傳知各國夷人不准代爲轉運進口並責成洋商將進口貨物詳細辨認如敢扶同含混卽行加重治罪迄今二十餘日該夷巡船貨船停泊長沙灣等處外洋雖風浪靡常仍遷延未去此封港一月以來之實在情形也茲復祇奉訓言當卽欽遵出示曉諭臚其罪狀宣布各夷俾知聖明用惠用威惟其自取旣以絕奸夷之望亦以安良賈之心至於該國貨船停泊外洋本未進口茲聞天威震怒自當警懷回帆惟奸夷之夾私者固仍冀售私卽良夷之載貨者亦未肯棄貨褻褻觀望勢所必然諒非空言所能諭遣臣等再三計議惟有嚴查影射以絕其銷貨之心廣緝奸徒以斷其售私之路先之以文告繼之以兵威使其計無復之必將窮而思返若敢始終留戀卽何惜搗穴焚巢惟外洋遼闊異常仍不得不審度機宜加以慎重此又臣等悉心籌議之梗概也抑臣等更有請者當粵東准通貿易之時載煙夷船尙且游奕各洋分投圖賣茲粵港旣經禁止該夷無可希圖而其售私牟利之心未必卽能盡泯竊恐改裝舫板由黑水夷洋越赴各路潛圖銷售除粵省東西兩路業經飭行沿海鎮協營寨併力巡查州縣文員嚴防口岸以杜偷運外其沿海各省以福建爲最近浙江江蘇次之應請敕下各直省督撫一體嚴行防堵以絕去路所有英夷貿易業已封港並遵旨籌議緣由謹會同廣東巡撫臣怡良廣東水師提督臣關天培合詞恭摺具奏伏乞皇上聖鑒訓示謹奏

林文忠公政書

乙集 兩廣奏稿

卷一

燒燬匪船以斷接濟摺

奏爲英夷被逐出口之後。仍在外洋寄旋逗留。現將攔近夷船各匪船。痛加燒燬。拏獲接濟漢奸。嚴審懲辦。使奸夷無所希冀。以免觀望售私。恭摺奏祈聖鑒事。竊臣等前奉諭旨。斷絕英吉利貿易。將該國船隻盡行驅逐出口。當經欽遵辦理。并列其罪狀。宣布各夷。復嚴禁他國夷商。不許私代英夷帶運貨物。卽他國貨船。出入盤查搜驗。亦皆加倍從嚴。業經節次奏蒙聖鑒在案。查英夷貨船。自驅出外洋之後。節據引水人等查報。陸續起旋揚帆。駛出老萬山外夷洋者。約有十餘隻。而觀望留連。不肯捨去者。尙復不少。並有新從彼國來粵。已過老萬山。始知封港。因不准進口。祇在外洋徘徊寄泊者。臣等旣將該夷乞恩之稟。嚴行批駁。堅與之絕。復令齎給批稟之通事引水等。嚴切傳諭。以此次封港。係欽奉大皇帝特頒諭旨。因該夷抗違法度。不許在粵通商。斷難希圖影射。若不作速回帆。設遇風火不測。皆爾等自作之孽。雖悔何追。惟該夷貪狡性成。帶私者固思乘閒覓售。卽載貨者亦豈甘心棄地。而義律虛憍素著。未曾受此折磨。

今斷其貿易。布其罪狀。伊既全無顏面。勢必別蓄詭謀。於是海上傳聞謠言不一。有謂英夷會集各埠兵船。同來滋擾者。有謂來船一二隻。滿載礮火。將逗留之貨船。盡扮兵船者。有謂該夷去秋求准通商。已將新煙載回夷埠。今貿易既斷。轉無顧忌。奸夷載去別貨。仍將鴉片換來。設計誘人玩法者。臣等竊思前兩說。本係恫喝。固不足信。而自去年責令繳煙以後。各處海口。早已戒備不虞。況此時既絕其通商。豈可不防其叵測。無論該夷有無兵船。續至即現在之吐密華倫兩船未去。度其頑抗之意。妄誇礮利船堅。各夷船特爲護符。謂可阻我師之驅逐。臣等若令師船整隊而出。遠赴外洋。併力嚴驅。非不足以操勝算。第洪濤巨浪。風信靡常。即使將夷船盡數擊沈。亦只尋常之事。而師船既經遠涉。不能頃刻收回。設有一二疎虞。轉爲不值。仍不如以守爲戰。以逸待勞。之百無一失也。惟後一說。以爲貿易既斷。轉無顧忌。傳聞貨去煙來。如果蓄此奸謀。倍當防其流毒。蓋粵洋漁船蛋艇之多。幾不可以數計。其人貪利亡命。無不遠赴外洋。而奸夷加意招徠。啗以倍蓰之利。卽一蔬一薪。亦皆厚給其值。並以鴉片與之兌換。使之兩獲其利。利愈重。則命愈輕。故夷船寄碇雖遙。而冒險犯法以趨之者。聞已漸相環集。此又斷其貿易之後。更出一種私弊。不可不亟亟剷除者。臣等再四思維。惟有以奸治奸。以毒攻毒。卽與提臣關天培密商。取平時所裝大小火船。卽雇漁蛋各戶。教以如何駕駛。如何點放。每船領以一二兵弁。餘皆雇用此等民人。以爲水勇。先赴各洋澳。分投埋伏。候至夜深。各船俱已熟睡。察看風潮皆順。卽令一齊放出。乘勢火攻。將此等環附夷船各匪船。隨燒隨掣。許以燒得一船。卽給一船之賞。如能延燒夷船。倍加重賞。此臣籌畫之辦法也。茲接關天培函稱。正月二十七日丑刻。原任遊擊馬辰。帶水勇四十名。由東涌上下濠前進。加都司銜之守

備盧大鉞帶水勇頭日盧麟等由屯門前進以都司用之守備黃琮由后海青山前進把總楊雄超帶水勇四十名與千總王應鳳外委朱鎮邦余興邦黃文祥區鎮江各由長沙灣前進將近夷船寄碇之處出其不意一齊發火復將噴筒火罐乘風拋擲燒去屠牛換土之大海船一隻買運烟土之艚船一隻大買辦艇一隻大扒艇一隻蝦筍辦艇三隻雜貨料仔艇一隻賣果子餠餅之扁艇十五隻又將夷船高頭三板前後延燒該夷駕駛逃開撲救漸熄未經沈沒又燒燬海中沙灘所搭篷寮六處所有通夷各奸民除在船燒斃及梟水脫逃淹斃不計其數外生擒身穿夷褲脚穿夷鞵之匪犯黃添福及接濟匪犯陳水生喬亞先林亞長鍾亞受劉亞五袁亞二巫亞二梁得勝林亞得共十名派委備弁管解來省審辦等情臣等查此次燒燬運土及濟夷匪船大小共二十三隻篷寮六處除燒斃淹斃各犯外生擒十名不惟足懾漢奸之心亦可以寒英夷之膽現將解到各犯嚴審重辦以示儆戒出力之弁兵水勇由臣等分別超拔獎賞以昭激勸並飭時加查探如夷船尚未遠颺匪船旋又趨附仍當相度潮信風勢再予會合焚燒緣奸民貪利忘生懲創不得不重而奸夷誘人玩法拒絕亦不得不嚴至別國出入夷船均遵禁令出具不敢夾帶鴉片並添具不敢暗代英夷運貨切結臣等仍多派妥幹員弁於各口加倍嚴查總期杜弊清源以仰副聖主訓諭諄諄之至意所有現辦情形臣等會同水師提督臣關天培粵海關監督臣豫堃合詞恭摺具奏伏乞皇上聖鑒訓示謹奏

密陳駕馭澳夷情形片附夷信

再澳門寄居西洋夷人歷三百年之久貨物自行收稅蓋屋轉賃他夷英吉利人早已垂涎其地自嘉慶

十三年閒。英夷突占澳門礮臺。旋經天朝官兵驅逐。從此西夷始有戒心。而澳中夷衆。良莠不齊。難保不被英夷句通煽誘。必使該夷官明於大義。上感天朝恩澤。下顧夷衆身家。始可固藩籬。而資捍衛。上年英夷義律。於繳清鴉片以後。卽有在澳門裝貨之請。經臣林則徐嚴切批駁。不許開端。伊之詭計不行。因而多方違抗。七月間。將澳內五十七家英衆。全行驅逐出澳。散住各船。而該夷每以三板駛近澳門。潛行窺探。是其處心積慮。未嘗一日忘也。嗣經不准通商。尤恐其鋌而走險。故於澳門水陸加倍嚴防。旣經前督臣鄧廷楨。奏請將新升南澳鎮總兵惠昌耀。留香山協之任。復與臣等奏請將高廉道易中孚。駐澳彈壓。均蒙聖慈。允其水陸官兵。陸續調派。分布澳內。澳外要隘者。各數百名。計已足資策應。惟澳地三面皆臨外海。英夷貨船。自經逐出之後。仍恃有吐密華倫兩兵船。爲之護符。不免乘閒遊奕。本年正月初間。義律與夷人數名。乘坐該夷兵船。至九洲停泊。義律等潛放三板。私行入澳。臣等接稟。卽飭嚴拏。旋據該道易中孚等。以西洋夷目稟稱。澳內華夷雜處。若兵役圍拏。恐致擾動。懇請稍緩。自必驅逐等語。臣等諭令限以日期。驅逐淨盡。若過期尙有英夷在澳。則西洋貿易。亦卽暫停。蓋馭夷不外操縱二端。而操縱只在貿易一事。夷性靡常。不得不以此爲把握。自責令西夷驅逐英夷之後。義律已卽出澳。而尙有英夷堅厘。臣担二名。逾期未去。臣等當將西夷貿易。示諭暫停。一俟英夷全逐出澳。仍卽照常通市。緣西洋夷人在澳內者。有天朝聲威可恃。而其出洋之船。一至夷界。則畏英夷之強。顧後瞻前。勢所難免。臣等責其容留英夷。停其澳中貿易。則西夷有詞可謝。而英夷遂無地可容。迨其逐去。而貿易復開。仍無損西夷生計。但係駕馭權宜之術。不敢明宣。惟有據實密陳。仰乞聖明垂鑒。至現准軍機大臣字寄。欽奉諭旨。據曾望顏

奏稱請封關禁海。又另片奏。澳夷互市。定以限制。著悉心妥議具奏等因。欽此。容臣等與水陸兩提臣。暨粵海關監督。備細熟商。總期計出萬全。始敢籌覈定議。另行會摺覆奏。再現值防夷喫緊之際。必須時常探訪夷情。知其虛實。始可以定控制之方。茲臣等訪獲英夷與西洋往來書信六封。密令諳曉夷字之人。譯出漢文。另錄清摺。恭呈御覽。謹奏。

謹將訪獲英夷義律吐密與澳門西洋兵頭。近日往來密信六封。譯出漢文。鈔錄清摺。恭呈御覽。

英吉利領事義律寄澳門西洋兵頭信

義律寄信與西洋兵頭。敦阿特厘阿加西阿打西爾威拉賓多。現在英吉利在中國貿易。首領事爲欽差。及省中官府強霸之事。我今以英吉利國家之名。懇請求准。將英人存下貨物。運至澳門。囤貯棧房。依澳門章程納稅。今我所求之事。並非立意欲破中國人所定之章程。將英國貨物在澳門出賣。與中國人。不過立意欲將英國之貨物。放於平安之地步。使各空船。可以開身。我今不必多言。惟望爾貴人施仁厚之德。與英吉利之人。我甚感激不淺。至我時常思想。欲將澳門變爲長久大利益之處。我等思想之事。時候已至。欲將貨物交澳門代理發賣。其權係在爾貴人手上。以我想來。此事亦並未破中國人所立之章程。今我求爾貴人。熟思此事。

一千八百四十年正月初一日。在澳門洋面窩拉疑兵船上。首領事義律印此。外夷本年正月初一日。乃是內地上年十一月二十七日。理合聲明。

西洋兵頭回信

西洋兵頭回覆管理英吉利在中國貿易首領事貴人義律之前明鑒。澳門兵頭等接得正月初一付來之信。欲將英吉利船上之貨物搬到澳門。不過欲將各貨放於平安地步。使各空船可以回國。觀此信中之事。我見得自己不能有如此大權回答。此件大緊要之事。兼以須依管理澳門地方之法律。我亦無如此大權。可能定奪此事。故我即將首領事之信。知會此處之西澤底大家商議。我等心中。雖欲應承。惟因中國官府禁止我等。不准與首領事有來往。我等雖欲將就首領事。惟因例禁。不能如我等所願。故不得已推辭首領事所請。現在我等并不爲所失。不能在澳做中國與外國貿易之利益而憂愁。乃爲不能遵首領事請帶貨物到澳囤積之事而憂愁。現在我亦不必多寫書信解明。因何不依首領事所請帶貨到澳門囤貯之事。蓋首領事曾在澳門居住數年。諒已知道在澳西洋人與中國官府之交情。尙望忠厚之英吉利國王。保護澳門。以免我等受從來所未受過之艱難危險。今我等已定奪。不能如首領事所請。故特寫此回信與首領事。求首領事明鑒體察。

一千八百四十年正月十六日。在澳門敦阿特厘阿加西阿爾威拉賓多印此。外夷本年正月十六日。乃是內地上年十二月十二日。理合聲明。

英吉利夷官吐密致西洋兵頭信

窩拉疑兵船船主吐密。寄信與西洋兵頭敦阿特厘阿加西阿打西爾威拉賓多。我現在實不隱瞞爾貴人。因爲中國官府出如此要重之告示。黏在澳門牆上。其中言語。英吉利住澳之人。讀之盡皆驚惶。爾貴人亦知道保護英吉利人之性命。乃係我之專責。目下之事。乃關於我之重任。欲遣一隻兵船。進至澳門。

港口不獨爲保護在澳居住之英吉利人。亦可以守著澳門。以爲有事時退步之計。而兵船進澳門。並無打仗之意。我正願爾貴人不必理我等與中國之事。如此。我亦十分恭敬爾貴人。

一千八百四十年二月初四日。在澳門洋面窩拉疑兵船上。吐密印此。外夷二月初四日。乃是內地正月初二日。理合聲明。

西洋兵頭回信

接爾貴人來信云。要遣兵船一隻進澳門港口之事。似是與我等國中對敵。蓋兵船進口。乃歷來禁止之事。卽爾貴人之國家。亦未必令爾攻敵我等之道理。當水師官特魯里時。亦併未有帶兵船進澳門港口之事。今爾貴人之非。我特講明。如果欲遣兵船到澳門港口。乃是不公義之事。現在爾貴人所行之事。與爾貴人去年所見。甚是不同。爾貴人若如此言行相違。我必將爾貴人之事。聲明與英國及我等國家知道矣。伏望上天保護於爾貴人。

一千八百四十年二月初四日。在澳門敦阿特厘阿加西阿打西爾威拉賓多印此。

吐密又寄西洋兵頭信

我今對爾說知。爾於本日付來之信。我已經收到。今復有信與爾貴人。現在英吉利人。要在西洋旗下居住。爾肯保護否。抑或爾竟任英吉利各人。如前六箇月。被人苦磨。不肯保護耶。如果實是不能保護英吉利人。須要英吉利人離去澳門。爾貴人據實說明。我亦立將兵船撤去。離此處澳門港口。并卽將爾所說之話。知會我本國之人。

一千八百四十年二月初四日。在窩拉疑兵船上。吐密印此。

西洋兵頭回信

本日內附來問我之信。緣我乃係我等國王命來代理此處事情之人。我今明回答與爾。此處地方與我等國王所管之別處地方不同。管別處地方。可以給別國人居住。若此處給別國人居住。此處地方之居民。卽不得安靜。又受驚嚇之事。斷斷不能。難道現在英吉利人。到船居住。豈卽有各樣擾害乎。豈必須到此處居住。以爲保護乎。前時英吉利人在澳門居住。我亦曾一體保護。此乃實在事情。人所共知。管理在中國之英吉利貿易首領事。曾讚揚於我。卽爾自己亦曾稱揚於我。惟現在此處之事情。已比從前不同。中國一封禁伙食。所有各樣貿易事務。皆已敗壞矣。爾亦知道我等國家與中國相交之章程律例。除卻破壞船隻。到來修理之外。從未有何等船隻。進至澳門港口。我今以我等國家之名。請爾出令。吩咐海阿新兵船。離去此處港口。俾我可盡心保護我國家之人民。在此地方得以平安。英吉利人。不要想我留他們在此處居住。我亦必守與中國人所定之章程。定不肯違背之。只是中國與英國兩邊之事。我皆不理。如在爾之第一封信內所說一樣。在爾不過係爲爾自己所受之重任。故行如此冒失之事。以違犯我等之法律。在此等行爲。豈得謂之好道理。此封信。乃我在議事亭與西拏底等會議時所寫。在爾只是指出英吉利人不在澳門居住之難處。並不思及西洋五千人。爲英吉利人朋友之情。亦受重累。自首領事回到此處之後。所有之貿易。皆要停止。所有之稅餉。爲西洋兵丁之費。以爲保英吉利人平日之平安。爾亦當思念及之。爾若不念我對爾說之事。我卽將近來九箇月內。所有之事。宣布與通天下知道。求各國依公義判斷。我又對爾說知。爾所行之事。不獨犯我國法律。乃亦有犯於英吉利國家之法律。伏望上天保

佑於爾。

一千八百四十年二月初四日。在議事亭內。敦阿特厘阿加西阿打西爾威拉賓多印此。

覆奏會望顏條陳封關禁海事宜摺

奏爲遵旨悉心籌議。恭摺覆奏。仰祈聖鑒事。竊臣等承准軍機大臣字寄。道光十九年十二月十一日。奉上諭。本日據會望顏奏夷情反覆。請封關禁海。設法勦辦。以清弊源一摺。又另片奏澳夷互市貨物。亦請定以限制等語。著林則徐。怡良。關天培。郭。并傳諭豫堃知之。欽此。臣林則徐。怡良。謹將鈔發原摺。細加閱看。並傳知臣豫堃一體領閱。因關各國夷人事務。祇宜慎密商辦。未便遽事宣揚。復經函約臣關天培。臣郭。於查閱營伍之便。過省面商。茲已詢謀僉同。謹將察看籌議情形。爲我皇上敬陳之。查原奏以制夷要策。首在封關。無論何國夷船。概不准其互市。而禁絕茶葉大黃。有以制伏其命。封關之後。海禁宜嚴。應飭舟師。將海盜剿捕盡絕。又禁大小民船。概不准其出海。復募善泅之人。使駕火船。乘風縱放。而以舟師繼之。能擒夷船。即將貨物全數給賞。該夷未有不畏懼求我者。察其果能誠心悔罪。再行奏懇天恩。准其互市。仍將大黃茶葉。毋許逾額多運。以爲箝制之法。所論甚切。所籌亦甚周。臣等查粵東二百年來。准令諸夷互市。原係推恩外服。普示懷柔。並非內地賴其食用之資。更非關權利其抽分之稅。況自上冬斷絕英夷貿易以來。疊奉諭旨。區區稅銀。何足計論。大哉謨訓。中外同欽。臣等有所秉承。更可遵循辦理。絕無所用其瞻顧。即將各外國在粵貿易。一律停止。亦並不難。惟是細察情形。有尙須從長計議者。竊以封關禁海之策。一以絕諸夷之生計。一以杜鴉片之來源。雖若確有把握。然專斷一國貿易。與概斷

各國貿易。揆理度勢。迥不相同。蓋鴉片出產之地。皆在英吉利國所轄地方。從前例禁寬時。原不止英夷販煙來粵。卽別國夷船。亦多以此爲利。而自上年繳清躉船煙土以後。業經奏奉恩旨。概免治罪。卽未使追究前非。此後別國貨船。莫不遵具切結。層層查驗。並無夾帶鴉片。乃准進口開艙。惟英吉利貨船聚泊尖沙嘴。不遵法度。是以將其驅逐。不准通商。今若忽立新章。將現未犯法之各國夷船。與英吉利一同拒絕。是抗違者擯之。恭順者亦擯之。未免不分良莠。事出無名。設諸夷稟問何辜。臣等卽礙難批示。且查英吉利在外國最稱強悍。諸夷中惟米利堅及佛蘭西。尙足與之抗衡。然亦忌且憚之。其他若荷蘭大小呂宋。連國。瑞國。單鷹。雙鷹。甚波立等國。到粵貿易者。多仰英夷鼻息。自英夷貿易斷後。他國頗皆欣欣向榮。蓋逐利者。喜彼絀而此贏。懷忿者。謂此榮而彼辱。此中控馭之法。似可以夷治夷。使其相聞相睽。以彼此之離心。各輸忱而內向。若概與之絕。則缺望之後。轉易聯成一氣。句結圖私。左傳有云。彼則懼而協以謀我。故難聞也。我天朝之馭諸夷。固非其比。要亦罰不及衆。仍宜示以大公。且封關云者。爲斷鴉片也。若鴉片果因封關而斷。亦何憚而不爲。惟是大海茫茫。四通八達。鴉片斷與不斷。轉不在乎關之封與不封。卽如上冬以來。已不准英夷貿易。而臣等今春查訪外洋信息。知其將貨物載回夷埠。轉將煙土換至粵洋。並聞奸夷口出狂言。謂關以內法度雖嚴。關以外汪洋無際。通商則受管束。而不能違禁。不通商則不受管束。而正好賣煙。此種貪狡之心。實堪令人髮指。是以臣等近日更不得不於各海口倍加嚴拏。有一日而船煙並獲數起者。可見英夷貨去煙來之言。轉非虛捏。不然。以外洋風浪之惡。而英夷仍不肯盡行開去。果何所圖。若如原奏所云。大小民船。概不准其出海。則又不能緣廣東民人。以海面爲生者。尤倍於陸

地故有漁七耕三之說。又有三山六海之謠。若一概不准其出洋。其勢卽不可以終日。至捕魚者。只許在附近海內。此說雖亦近情。然旣許出洋。則風信靡常。遠近幾難自定。又孰能於洋面而阻之。卽使責令水師查禁。而晝伏則夜動。東擊則西逃。亦莫可如何之事。臣林則徐上年刊立章程。責令口岸澳甲編列船號。責以五船互保。又令於風帆兩面。及船身兩旁。悉用大字書寫姓名。以及里居牌保。惟船數至於無算。至今尙未編完。繼又通行沿海縣營。如有夷船竄至。該轄無論內洋外洋。均將附近各船。暫禁出口。必俟夷船遠遁。始許口內開船。其平時出入漁舟。逐一驗查。只許帶一日之糧。不得多攜食物。若銀兩洋錢。尤不許隨帶出口。庶可少除接濟購買之弊。至大黃茶葉二物。固屬外夷要需。惟臣等歷查向來大黃出口多者。不過一千擔。緣每人所用無幾。隨身皆可收存。且尙非必不可無之物。不值爲之厲禁。惟茶葉歷年所銷。自三十餘萬擔。至五十餘萬擔不等。現在議立公所。酌中定制。不許各夷逾額多運。卽爲箝制之方。然第一要義。尤在沿海各口。查拏偷漏。若中路封關。操之過蹙。而東西各路。得以偷販出洋。則正稅徒虧。而漏卮依然莫塞。是以制馭之道。惟貴平允不偏。始不至轉生他弊。若謂他國買回之後。雖保不轉賣英夷。此卽內地行鋪互售。尙難家至日見。而況其在域外乎。要知英夷平日廣收厚積。本有長袖善舞之名。其分賣他夷。以牟餘利。乃該夷之慣技。今斷絕貿易之後。卽使從他夷轉售一二。亦已忍垢蒙恥。多喫暗虧。譬如大賈殷商。一旦僅開子店。寄人籬下。已覺難堪。惟操縱有方。備防無懈。則原奏所謂該夷當畏懼而求我者。將於是乎在矣。至於備火船。練鄉勇。募善泅之人等事。則臣等自上年至今。皆經籌商辦理。惟待相機而動。卽各山淡水。上年本已派弁守之。始則夷船以布帆兜接雨水。幾於不能救渴。繼而覓諸山

麓隨處汲取不窮。則已守不勝守。似毋庸議。總之馭夷宜剛柔互用。不必視之太重。亦未便視之太輕。與其涇渭不分。轉致無所忌憚。曷若薰蕕有別。俾皆就我範圍。而且用諸國以併拒諸夷。則有如蹄鹿。若因英夷而並絕諸國。則不啻驅魚。此際機宜。不敢不慎。況所杜絕者。惟在鴉片。卽原奏亦云。凡有夾帶鴉片夷船。無論何國。不准通商。則不帶鴉片者。仍皆准予通商。亦已明甚。彼各國夷人。原難保其始終不帶。若果查出夾帶。應卽治以新例。不但絕其經商。如其無之。自不在峻拒之列也。又另片請將澳門西洋貿易。定以限制。查上年臣林則徐先已會同前督臣鄧廷楨。暨臣豫堃。節次商議及之。嗣經核定章程。諭令澳門同知轉飭西洋夷目遵照。卽如茶葉一項。每歲連箱准給五十萬斤。仍以三年通融併計。以示酌中之道。其他分條列款。該夷均已遵行。本年正月。澳內容留英夷。卽暫停西洋貿易。迨其將英夷驅出。仍卽准令開關。亦與原奏請議章程。不謀而合。至所請責令澳夷代英夷保結一節。現既不准英夷貿易。自可毋庸置議。臣等彼此商酌。意見相同。謹合詞恭摺覆奏。伏乞皇上聖鑒訓示。再此摺係臣林則徐主稿。內有密陳夷情之處。謹請毋庸發鈔。合併聲明。謹奏。

林文忠公政書

乙集 兩廣奏稿

卷二

尖沙嘴官涌添建礮臺摺

奏爲籌議添建礮臺兩座以資控制而重海防恭摺奏祈聖鑒事竊照廣東水師大鵬營所轄洋面延袤四百餘里爲夷船經由寄泊之區其尖沙嘴一帶東北背負岡陵西則有急水門雞踏門東則有鯉魚門佛堂門而大嶼巨島又卽在其西南四面環山藏風聚氣波恬浪靜水勢寬深英夷船隻久欲倚爲巢穴而就粵省海道而論則凡東赴惠潮北往閩浙之船均不能不由該處經過萬一中途梗阻則爲患匪輕上年因英吉利桀驁不馴抗違禁令經臣等與前督臣鄧廷楨調集官兵在尖沙嘴迤北之官涌等處山梁扎營安礮分爲五路痛加勦擊該夷兵船二隻貨船數十隻始皆連夜遁去但恐兵撤之後仍復聯檣聚泊勢若負嵎必須扼要設防方足以資控制隨飭候補知府余保純署大鵬營參將賴恩爵新安縣知縣梁星源會同周歷履勘旋據該員等稟稱尖沙嘴山麓有石腳一段其形方長直對夷船向來聚泊之所又官涌偏南一山前有石排一段天生磐固正對夷船南洋來路若兩處各建礮臺一座聲勢旣相聯

絡而控制亦極得宜等語。當經飭令將兩臺高寬丈尺及開築地平並建造牆堞礮洞弁署兵房神廟望樓藥局馬路一切工料價值覈實確估據該員等呈送圖說清摺臣等逐一核算並委員詳細稽查凡有可以撙節之處復經酌量核減計尖沙嘴礮臺估需工料銀一萬七千九百五十一兩零官涌礮臺估需工料銀一萬四千四十六兩零實係省之又省必不能少竊思此項工程係屬防夷要務斷不可緩第國家經費有常仍不敢請動帑項臣等當與藩臬運司公同籌畫查有前山營生息一項係由洋商捐銀發交當商生息前於嘉慶十四年奏明作爲添設前山營兵餉之用按年覈實支銷已歷三十餘年之久因而存有積併盈餘截至道光十九年五月底報部冊開實存銀五萬三千八百餘兩除大鵬營現議更改營制所需添造快船建立衙署及製備新兵器械另摺請在此款動支外核其成數尙足以敷動撥前項礮臺工料之需合無仰懇聖恩俯念礮臺工費爲防夷所需而捐款息銀與庫項有閒准於商捐前山營生息一項銀兩動支兩座礮臺經費並請循照舊章將動用銀兩總數於冊內開除造報免造工料細冊報銷感荷鴻慈倍無既極至此項工程因夷務喫緊之際先已購料興工趕緊建築務於夏令南風盛發以前一律完全以資防制計兩臺應安大礮五十餘門亦已於腹地各營酌其緩急情形先行運撥濟用一面籌資購補期於普律森嚴以仰副聖主綏靖海疆之至意所有籌議添建礮臺緣由據藩臬運司會詳前來臣等謹會同廣東水師提督臣關天培合詞恭摺具奏伏乞皇上聖鑒訓示謹奏

請改大鵬營營制摺

奏爲察看廣東水師情形大鵬營現居緊要籌議改設副將並添撥移改官兵船隻等項以資守禦而重

原
书
缺
页

原
书
缺
页

一十名。遞年節存馬步糧料等項銀兩撥補增添步守兵丁一百零六名。歲需經費之用。此外仍需把總二員。外委一員。步兵連外委本身糧名七十五名。守兵一百七十五名。應於督標五營及永靖營酌抽把總二員。陸路提標五營酌抽外委一員。其原食馬糧一分。勿庸隨撥。併於陸路各營勻撥步兵七十五名。守兵一百七十五名。共兵二百五十名。均歸大鵬入額。其外委仍食本身步糧。並在大鵬步兵數內添設額外委四員。仍支本身名糧。以資差遣。至澄海地方。應將澄海協改爲澄海營。卽將大鵬參將移駐。作爲澄海營參將。澄海原有守備二員。分爲左右二營。左營守備駐劄蓬州所城。右營守備駐劄樟林所城。均未便移改。將大鵬左營守備改爲澄海左營中軍守備。駐劄縣城。經管兩營錢糧。其澄海左營守備改爲左營左軍分防守備。仍駐蓬州。右營仍循其舊。以資防守。所有現改大鵬協副將都司及澄海營參將左營中軍守備。左營左軍分防守備。俱照舊定爲外海水師題補之缺。其水陸各營抽撥兵丁所需糧餉公費紅白等項。以及一切軍裝器械。俱由各營撥出隨帶。毋須另添。澄海協改駐參將守備。有原設副將都司衙署。可以棲息辦公。大鵬所城改設都司。亦有守備原署可住。其防守礮臺弁兵。卽住礮臺。均毋須另建衙署。惟大鵬添設大快船二隻。各營無可抽撥。應另行製造。計每隻需用裝造工料銀四百三十二兩。二船共銀八百六十四兩。歲需弁兵口糧燴洗。以及修費等項。約需銀一千四百餘兩。又九龍地方改駐副將紅香爐添設汛防。應建衙署兵房。以及大鵬新兵。應製號衣器械等項。所需經費。均須預籌。查有前山營生息一項。從前係由洋商捐出本銀十萬兩。發交當商生息。以作添設前山營兵餉之用。除每年支用外。截至道光十九年五月底止。實存銀五萬三千八百餘兩。除另摺奏請動支。添建尖沙嘴官涌兩

礮臺工料。共銀三萬一千九百餘兩外。所有此次添造快船。及建造衙署。製給新兵號衣器械等項用費。均請於此項息銀內動支。毋庸請動帑項。如此改調添設。因地制宜。似於海疆控制。大有裨益。如蒙俞允。所有添造快船。應建衙署兵房。製給新添步守兵丁軍械等項。臣等卽飭令地方文武。會同確估辦理。其改設副將等官。應行鑄換關防。並一切營制抽撥細數。及未盡事宜。統容另行咨部核辦。再前山營生息本銀。係由洋商捐出。與正雜錢糧不同。每年止將收支實存數目。報部查核。今請動支此項息銀。以作添造快船衙署製給軍械經費。應俟動用後。將支用總數於冊內開除造報。懇免備造工料細冊報銷。合併陳明。臣等謹會同廣東水師提督臣關天培。陸路提督臣郭 合詞恭摺具奏。伏乞皇上聖鑒訓示。謹奏。

請將烟犯財產充賞片

再粵東鴉片之多。本什百於他省。自上年查辦至今。除收繳夷薨二萬餘箱外。其起獲內地民人。與販囤藏者。亦不下五十餘萬兩。皆經陸續燬化。期於盡滌前污。察看各屬府縣城廂。凡在耳目昭著之地。大都漸就肅清。而鄉曲邨莊。山重水複。往往恃其僻遠。藏垢納污。舊時旣不少窩存。聞挈又轉相寄頓。或深房密室。守以婦女。而莫能窺。或祠廟山林。埋以坑窖。而無由識。甚至裝爲棺柩。假作墳塋。詭祕萬端。出人意表。間有訪聞破獲者。全藉眼線。密爲伺察。於其藏匿處所。探知真確。乃得搜起原贓。若眼線不真。搜查無獲。則奸民有所藉口。轉恐釀成事端。故從前烟禁鬆時。患在得規包庇。迨禁嚴而情僞疊出。又患在託名慎重。瞻顧畏難。蓋趨避者衆人之常情。而因循者官場之積習。以爲拏獲不多。不過責以疏懈。若辦理不

善。卽恐坐以愆尤。而且僱線先須給資。獲案又須重賞。賞不重。則作線之人不來。卽來者亦必不確。其能爲精確之眼線。必與烟犯素相親密之人。所以不避怨嫌。引官指拏者。無非圖利耳。激於義憤。固無其人。挾仇邀功。亦不多見。惟利重則衆人爭趨。雖親密者。亦不相顧。此粵東風氣。一時難以轉移。而不得不乘機以導之者也。官予以利。卽爲官用。否則走私護私。皆其慣技。未有不轉爲私用者矣。爲私用。則私愈不得破。而官愈不得知。故官必須不惜重貲。而後能用此輩。然近日州縣。無論其未必樂於捐資。卽欲捐而無可捐之資。亦安得而責之。若營汛武弁。則潔己者。已難其人。更何從語以出資僱線之事。雖臣等於報獲案犯。疊經捐銀給賞。而究不足爲常。外此則籌款勸捐。事皆窒礙。倘因無資購線。以致若輩轉助販私。則長惡滋奸。所關匪細。查上年軍機大臣議准浙江撫臣烏。奏立禁烟章程內稱。嗣後守口兵弁。能將商漁船隻。所帶成箱烟土拏獲者。將船及貨。一半賞給首獲之人。餘貨分賞同查之人。又海船偷帶烟土。無論舟人行戶。能將藏匿處所指明首告。卽將船貨給予舉發之人等語。是海船夾帶鴉片。首報之人。卽時得邀重賞。而內地之窩販。似亦可以例推。且新例窩口烟館與販之本犯。與知情租雇之業主船戶。其房屋船隻。皆應一律入官。是破案之後。產業已爲官物。然若必俟由官召變。始以價銀充賞。則延緩需時。竊恐有名無實。仍不足以示勸。蓋州縣承領估變例。應會同委員。勘造估冊。上下衙門。層層駁估。總須報部核定。方能作準。往往累月經年。十不變一。而空房封鎖。已爲鄉鄰作踐。匪丐潛蹤。又安得有人承受。有司憚於賠累。甘受遲延處分。故歷來入官未變之產。案牘纍纍。皆其明驗也。竊思信賞必罰。法旣不可枉。膏亦不可屯。與其候變無期。何若卽時充賞。且如米穀出洋被獲。本有船貨給賞之條。而卡隘緝拏私鹽。

亦有車畜並賞之例。今鴉片之害較之私運米鹽奚啻霄壤。則報獲之賞似亦不可獨虛。應請嗣後掣獲販賣鴉片之案。於審明定讞後。除烟土烟膏烟具悉數繳官燬化外。所有該犯船貨產業概准分別給賞。無論在洋在岸一體照行。倘有栽烟誣賴希圖冒賞亦必確審實情。遵照新例不分首從。按法嚴辦。庶查拏首報之人有所圖而不相隱庇。亦有憚而不敢誣妄。而囤販爲奸之輩藏烟雖密。破案不難。於杜絕根株似有裨益。如蒙俞允。所有粵省已獲各案。臣等均卽飭屬遵辦。並請免其造冊咨部。以省案牘。是否有當。謹合詞附片具奏。伏乞聖鑒訓示。謹奏。

焚剿夷船擒獲漢奸摺

奏爲欽遵批諭。嚴密防範英夷。並經設法焚剿夷船。辦艇擒獲。接濟漢奸。謹將辦理情形。恭摺奏祈聖鑒。事。竊臣等前次附片具奏。英夷逗留外洋。常懼火船。猝往焚燒。並傳聞該國有大號兵船將至。加意嚴防。各緣由。欽奉硃批。無論虛實。總當不事張皇。嚴密防範。以逸待勞。主客之勢自判。彼何能爲也。勉之。欽此。仰見我皇上運籌決勝。洞燭夷情。臣等跪誦服膺。莫名欽感。伏查英夷近日來船。所配兵械較多。實仍載運鴉片。探係該國孟啊拉等處。夷埠。聞知內地辦烟嚴緊。銷路日稀。而夷埠新舊烟土。存積纍纍。不肯輕棄。是以減跌價值。用三桅大船滿載而來。而奸夷遂藉以揚言恫喝。冀可准其貿易之求。迨見臣等拒之益堅。不爲所動。其到粵之吐密華倫都魯噎兵船三隻。並現在續到之谷吧吐兵船一隻。亦祇在外洋往來游奕。此東彼西。總無定處。日則暗放三板。分運煙土。引誘奸民。零星賤賣。夜則拋錨寄碇。並招集辦艇環護。支更瞭望。以防我兵火攻。此外別無動靜。誠如聖諭。實無能爲。惟思峻拒英夷。原爲斷絕鴉片。乃奸

夷仍私在外洋售賣。卽奸民必販至內地行銷。積弊何日能清。前功尤虞盡棄。且該夷詭計百出。竟不憚虧本以誘愚民。查近日公班大土一箇。僅賣洋銀五六圓。較之前年秋冬。價減十分之七。並訊據先後獲到煙犯供稱。有以鵝鴨十隻。換得公班土一箇者。並有買過一二次。卽可向夷人賒烟者。在彼總欲愚弄沿海之漢奸。以阻撓常官之禁令。實屬可惡已極。臣等於前次燒燬接濟匪船二十三隻之後。仍嚴飭水陸文武。力拏通夷匪犯。並設法懲創奸夷。因其防備甚周。未易乘機下手。先於四月間。接據新安縣知縣梁星源稟報。會同營弁。在小濠海邊。續燒辦艇四隻。篷寮五間。又獲夷船上廚工。梁亞次等六名。除與所獲潛買烟土各犯。並案審辦外。一面函商水師提臣關天培。以夷船最畏焚燒。仍惟以所畏者。設法制之。隨經關天培委令副將李賢。都司馬辰。守備黃琮。盧大鉞。林大光。選帶能事把總潘永蓁。楊雄超。廖鎮邦。關東。及外委盧麟等。密授機宜。相度形勢。分帶兵勇四百餘名。暗伏島澳。並多雇素諳夷語線民。假裝濟夷辦艇。作爲內應。仍於各隘口。分派弁兵防堵。五月初九日。乘夜半月落時候。各隊火船。移近磨刀外洋。夷船聚泊處所。占住上風。出其不意。火船闖進夾燒。各線民亦於假辦艇內。同時縱火。有巴厘夷船上。身穿白衣英夷。持械跳出。經外委盧麟。揮令水勇方亞早等。奮力殺斃四人。其餘夷衆。連船全行燒燬。各將備督率把總潘永蓁。楊雄超等。乘夷船亂奔之際。將火箭火礮。噴筒等物。紛紛拋擲。又將載有烟箱之夷船。燒燬一隻。另有夷船一隻。桅帆著火。棄棹駕逃。經夷衆將火撲救。先後延燒大小辦艇十一隻。又燒燬近岸篷寮九座。其衝突竄逃。各夷船彼此撞碰。叫喊不絕。夷人帶傷跳水。燒斃溺斃。及被烟毒迷斃者。不計其數。我兵並無被害。惟於殺斃巴厘船上夷人時。有水勇二名。被夷劍斫傷手膀。尙不甚重。該將備等

於火發後分投截擊逸艇。適有罟船一隻。慌忙奔竄。當將人船並獲。其船內有烟盒烟槍。及各種烟具。一併起出。又有棄艇。逃赴篷寮。及內篷寮復逃之犯。亦俱擊獲。計先後獲犯姜亞連等十三名。現在行提嚴審辦理。此次該英夷。猝遭焚剿。傷斃已多。而都魯噎船上。帶兵之夷官贊卒治厘。亦在該船病斃。並查悉夷兵吸水受毒。患病者甚衆。似此頻經受創。當亦共知天朝重地。非幺魔異類。所可玩法偷生。如再抗不回帆。抑或別滋奸計。臣等仍惟恪遵批諭。不事張皇。明則以逸待勞。倍森嚴而鎮靜。暗則相機而動。期震讐其貪頑。一切機謀。密之又密。以仰副聖主訓誨諄諄之至意。至英夷未銷貨物。恐其私行寄頓。影射進口。節經臣等會同粵海關監督臣豫墜。逐一嚴查。卽他國貨船中。稍有形蹟可疑者。如米利堅國之必吐一船。吐蔑一船。呂宋國之吻噸一船。因查閱該國船牌貨單。譯出漢文。與現船所載貨物。未盡符合。立卽逐出。不准進口。嗣後尤當時加釐剔。務使各國夷人。咸知法度嚴明。不敢希圖朦混。以肅海禁。而絕詭謀。所有現辦情形。謹會同水師提督臣關天培。恭摺具奏。伏乞皇上聖鑒。謹奏。

查獲汛弁黎祥光等串詐客船片

再粵東河道綿長。時有匪蹤出沒。不得不分遣兵役。管駕巡船。往來梭緝。而查弊之人。難保非卽舞弊之人。是以疊飭縣營。嚴查舉發。不准稍有徇庇。茲據署清遠縣知縣黃炳然。三水縣知縣浦國仁。先後稟報。有南海縣客民林裕利。在韶州府城。買得鐵釘一百五十餘擔。領有關口稅單。遣夥會顯揚雇船運赴佛山發賣。本年三月初六日。船至清遠縣石基河面。被巡船搬搶。鐵釘一百一十餘擔。尙存三十餘擔。初九日。船至三水縣省江河面。復被該處弁兵搬搶。均勒寫失水字據。原領稅單。被初處搶鐵船上。丟棄河中。

經該事主林裕利之兄林裕勝呈報。該二縣會營勘訊通稟。並據各該管將領查明揭報。將汛弁黎祥光、歐國泰、盧廷彪、黃安邦同各汛兵何得剛等。並請斥革。解省審辦。臣當即提訊。據該汛弁兵僉供。因清遠營大燕汛一帶水溜河寬。恐有販私偷漏。會倩線民密加偵探。本年三月初六日。線民白亞彪報。有客船運載私鐵經過。該汛目兵何得剛稟明界排汛額外。歐國泰轉告把總黎祥光。帶同三四兩號巡船。駕至石碁河面。趕赴客船。聲稱緝私。起出鐵釘。搬入四號巡船。其時客夥曾顯揚。祇以空言分辯。初未說有稅單。迨把總黎祥光趕到。詢以若非私販。有何爲憑。該客夥甫將稅單呈驗。該把總始知誤向搜查。而四號巡船已搬有鐵釘七十二簍。先載回營。該把總慮被控告。當將稅單丟棄河中。令寫失水字據。希圖寢事。該客船仍載餘鐵前行。其大塘汛外委黃安邦亦因線人誤報。帶同本汛及附近各汛兵丁。駕船至三水縣胥江河面守候。初九日見該客船經過。指爲走私。搜得鐵釘三十二簍。搬載回汛。該客夥將原有稅單。被大燕汛弁丟棄。令寫失水緣由。詳晰言明。該弁兵亦恐告發。令其照寫失水字據。船聽開行。各汛弁所起鐵釘均已賣銀分用。此訊據大燕大塘等汛各弁兵所供。客船經由清遠三水兩縣石碁江河面。先後被搜鐵釘之大略情形也。查該客船所載鐵釘既執有關口稅單。自非私販。大燕等汛弁兵即使先係誤搜。迨見稅單何以不卽還贓。轉向勒寫字據。且大燕汛既經搜過。未將人船截留。大塘汛弁兵何得更疑其爲走私。將鐵釘全行搬載回營。况鐵釘並未繳官。竟各瓜分售賣。明係假巡緝爲由。串同搶奪。迨發覺提省。復因事主客夥未到。恃無質證。隱匿真情。卽各該管守備亦難保無庇縱情事。現將清遠右營守備伍志雄。署三水營守備事千總余孔彰均先撤任。調至省城備質。員缺另委接署。其犯事之把總黎祥

光。盧廷彪。外委黃安邦。額外歐國泰。同各汛兵。何得剛等。一併褫職。革糧發司。飭傳事主客夥。勒集未到。犯證。研審確情。據實按擬。照例分別奏咨外。臣與撫臣。暨水陸提臣。仍嚴飭各文武於員弁兵役。實力稽察防閑。如有軌法營私。務卽痛加懲創。以安商旅。而靖地方。謹將查獲弁兵串詐。現在審辦緣由。附片奏聞。伏乞聖鑒。謹奏。

林文忠公政書

乙集 兩廣奏稿

卷三

追奪張石氏誥封摺

奏爲核辦控案。查有再醮婦女。冒受封典。應行追奪。誥軸。以重名器。恭摺奏祈聖鑒事。竊照本年二月間。有籍隸新會縣。寄居南海縣之張石氏。赴臣衙門遞呈。以伊夫原任福建閩安協副將張保。在日曾於嘉慶十五年間。將銀二萬八千兩。交付職員伍耀南。生息置產。有書信收單爲據。道光二年。夫故。四年。該氏自閩回粵。上年二月。向討被吞。控縣未結等情。當查張保。卽係嘉慶年間投誠之洋盜張保仔。曾任副將身故。其生前果否將銀託人置產被吞。自須查有確據。方可著追。卽經批司。飭縣錄案。申送核辦。並因張石氏呈內。自稱命婦。果否受有誥封。亦須查明。以防假冒去後。茲據南海縣知縣劉師陸。稟覆此案。據張石氏與伍耀南在縣控訴。訊無中證爲憑。所繳信單。飭令伍耀南當堂寫字。核對筆蹟。迥不相符。該氏現年六十五歲。先嫁鄭一爲妻。夫故之後。改嫁與張保爲繼室。道光元年。曾經請有封典。稟請核辦。前來。臣查張石氏自閩回粵。十有六年。其夫張保在日。果有交存伍耀南銀二萬八千兩。何肯任欠多年。近始出

控。且既稱嘉慶十五年交銀置產。維時張保已在廣東省城入伍。何難將伍耀南代置各產之契收回執業。而轉任其侵收花息。至三十年之久。尤非情理。况所執信單。乃本案要據。經該縣比對筆蹟。絕不相符。又無中證爲憑。明係捏造圖詐。業已飭縣速行究結。勿任狡延。至張石氏前夫鄭一。乃從前廣東洋盜之渠魁。黨夥蔓延。橫行海上。倖逃顯戮。自伏冥誅。張保卽張保仔。本係蠻戶。幼嗣鄭一爲子。並受安南國僞封。鄭一斃後。接管幫船。所聚大小匪艇數百隻。盜夥數萬人。劫掠商民。戕傷將士。其罪逆更有甚於鄭一。粵省濱海邨莊。受其荼毒之慘。至今閭巷傳聞。痛心切骨。卽嘉慶十五年閒。悔罪乞誠。其中反覆情形。亦非一次。均有舊案可稽。當時在事諸臣。舍剿言撫。亦係爲民蘇困。事出權宜。現在遞呈之張石氏。卽鄭一之妻。改適張保。以疊作萑苻之眷屬。竟濫邀翟芾之光榮。是其名節俱虧。實恐玷汗章服。查命婦夫亡再嫁。按律尙應擬罪追奪。所以勵貞操。而重名器也。今張石氏係再嫁後請封。尤爲冒混。現尙恃係命婦。平空捏詐。纏訟不休。自應奪其原請誥軸。送部察收。仍將該氏飭族約束稽查。庶足以儆奸邪。而維風化。臣謹會同廣東巡撫臣怡良。恭摺奏聞。伏乞皇上聖鑒訓示。再查張保之子張玉麟。曾蔭千總。現年二十七歲。並未投營。亦有被控聚賭之案。併飭審明虛實。另行覈辦。合併陳明。謹奏。

英夷續來兵船情形片

再英吉利夷船逗留外洋。臣等疊飭各將弁。帶領兵勇火船。設法焚剿。於五月初九日。乘夜縱火燒燬夷船三隻。業經會摺奏聞在案。查該夷自貿易斷後。每揚言兵船多隻。卽日到粵。臣等不爲所動。而仍密爲之防。除上年所到之士密華倫兩船。與近時續到之都魯噎谷巴吐兩船。在外洋游奕情形。先已查明具

奏外。茲據澳門文武稟。據引水探報。五月二十二日。望見九洲外洋。來有兵船二隻。一係大船。有礮三層。約七八十門。其一較小有礮一層。二十三日。陸續又來兵船七隻。均不甚大。礮位亦祇一層。又先後來有車輪船三隻。以火焰激動機軸。駕駛較捷。此項夷船。前曾到過粵洋。專爲巡風送信。茲與各兵船。或泊九洲。或赴磨刀。或赴三角外洋。東停西竄。皆未敢駛近口門。臣等查中路要口。以虎門爲最。次卽澳門。又次卽尖沙嘴一帶。其餘外海內洋相通之處。雖不可勝數。然多係淺水暗礁。祇足以行內地之船。該夷兵船不能飛越。所有虎門各礮臺。先已添建增修。與海面所設兩層排鍊。相爲表裏。猶恐各臺舊安礮位。未盡得力。復設法密購西洋大銅礮。及他夷精製之生鐵大礮。自五千斤至八九千斤不等。務使利於遠攻。現在該處各礮臺。計有大礮三百餘位。其在船在岸。兵勇隨時分撥。共有三千餘名。至澳門地方。自奏委高廉道易中孚。與奏留升任之香山協惠昌耀。會同防範。先後派駐兵勇。亦有一千三百餘名。又尖沙嘴一帶。新建礮臺兩座。業已趕辦完工。並設法購辦大礮五十六位。分別安設。其附近山梁。駐兵共有八百餘名。此外各小口。及內河水陸要隘。亦皆添兵多名。協同防堵。聲勢已皆聯絡。佈置並不張皇。現在該夷兵船。亦祇飄泊外洋。別無動靜。卽使此後漸圖窺伺。而處處皆有準備。不致疎虞。此時商旅居民。極爲安謐。卽他國在澳夷人。亦皆各自貿易。安靜如常。而臣等密察周防。總不容一刻稍懈。且隨處偵拏。接濟嚴斷。漢奸務令盡絕。旬通俾其坐困。第恐在粵無可乘之隙。該夷船趁此南風盛發。輒由深水外洋。揚帆竄越。臣等現又飛咨閩浙江蘇山東直隸各省。飭屬嚴查海口。協力籌防。以冀仰紓宸念。謹合詞繕片附陳。伏乞聖鑒。謹奏。

英夷兵船情形片附夷帖

再英吉利來粵兵船。除上年所到之吐密華倫兩船。及本年續到之都魯噎谷巴吐兩船。先經隨時奏報。嗣於五月二十三等日。又到大小兵船九隻。車輪船三隻。遊奕外洋。東停西竄。臣等示以鎮靜。不事張皇。而仍嚴密周防。於水陸各要隘。加礮添兵。處處準備。並嚴挈接濟。杜絕勾通。復將籌辦情形。於五月二十五日。附片奏聞在案。茲查近日該英夷。又先後到有大小兵船十隻。車輪船二隻。仍止散泊外洋。別無動靜。並揚言不先尋釁。諒欲懈我軍心。旋於海灘上。插一木牌。寫有漢字說帖。妄稱內地船隻。不准出入粵省門口。俟英國通商。再行無阻。又稱魚船日間出入。不爲攔截。各邑鄉里商船。可赴英國泊船之處。貿易等語。查英夷中有嗎里遜。能書漢字。上年一切夷稟。皆出伊手。此次說帖。諒卽該夷人所寫。揣其鬼蜮伎倆。一則希圖挾制通商。一則招引奸徒與販。所稱不先尋釁之言。又大相刺謬。當經函囑提臣關天培。如果該英夷膽敢攔阻行舟。卽當示以兵威。不容滋擾。又查該夷說帖內。有國主命伊前往中國海境。據實奏明之語。而先來之谷巴吐一船。及後到之布林麻等船八隻。車輪船三隻。又據引水稟報。於五月底。及六月初間。先後駛出老萬山。東向揚帆而去。瞭望無蹤。飭據洋行總商伍紹榮等。轉呈米利堅夷稟。譯出漢字。內稱聽說英夷兵船。係赴浙江江蘇。又有人說往天津等情。臣等復查夷情詭譎。凡事矯飭虛張。固難憑準。而現值南風盛發。外洋茫茫無界限。亦無從遏止前行。如其駛至浙江舟山。或江蘇上海等處。該二省已疊接粵省咨文。自皆有備。不致疎虞。若其逕達天津。求通貿易。諒必以爲該國久受大皇帝怙冒之恩。不致遽遭屏斥。此次斷其互市。指爲臣等私自擅行。倘所陳尙係恭順之詞。可否仰懇天恩。仍優以

懷柔之禮。勅下直隸督臣查照嘉慶二十一年間英國夷官羅耳阿美吐德等自北遣回成案。將其遞詞人由內河逐站護送至粵。藉可散其牙爪。較易就我範圍。倘所遞之詞有涉臣等之處。惟求欽派大臣來粵查辦。俾知天朝法度。一秉大公。益生其敬畏之誠。不敢再有藉口。事關控制外夷。臣等管窺所及。謹合詞附片密陳。並將該夷說帖另錄清摺。恭呈御覽。伏乞聖鑒訓示。再沿海閩閩現俱照常靜謐。合併聲明。謹奏。

抄錄夷帖

謹將英夷兵船所出漢字說帖鈔錄清摺。恭呈御覽。

大英國特命水師將帥爲通行曉諭事。照得粵東大憲鄧林等因。玩視聖諭。相待英人。必須秉公謹度。輒將住省英國領事商人等。詭譎強逼。捏詞誣騙。表奏無忌。故此大英國主欽命官憲。著伊前往中國海境。俾得據實奏明御覽。致使太平永承。妥務正經貿易。且大英國主恭敬皇帝。懷柔內地安分良民。嚴命本國軍士。設使民人不爲抗拒。卽當凜行保全。各人自家產業。是則該民無庸驚懼。乃可帶同貨物接濟。赴到英師之營。汛定要施惠保護。給爾公道價錢也。且大憲鄧林捏詞假奏。請奉皇帝停止英國貿易之諭。以致中外千萬良人。吃虧甚重。緣此大英國將帥現奉國主諭旨。欽遵爲此告示。所有內地船隻。不准出入粵東省城門口。兼嗣後所指示各口岸。亦將不准出入也。迨俟英國通商。再行無阻。本將帥纔給符官印。發檄曉諭。所應經商之港口。不爲攔截。又沿海各邑鄉里商船。亦准往來。可赴英國船隻停泊之處。貿易無防。特示。

嚴辦烟案栽贓人犯片

再臣等嚴拏鴉片。尤必重辦栽贓。緣差役眼線。皆非正人。在密查暗訪之時。斷不能不用。而假公濟私之弊。實不可不防。是以諄飭各屬。凡帶差役線人。查拏烟案。必先將其人搜檢一過。無夾帶者。方許上前。又獲到烟犯一名。卽令獲犯之人。將如何查拏情形。當堂詳細供指。使烟犯聞知。無可置喙。然後再向該犯。追究鴉片來歷。以成信讞。而杜侵欺。第烟犯情節。各不相同。有不必栽贓者。亦有不能栽贓者。如平日本係著名窯口。及積慣興販。早爲人所共知。或聞拏先逃。久而始獲。則雖棄贓滅迹。亦不能末減其辜。其或首夥先後到案。供證僉同。或查獲帳簿發單。已有賣烟確據。則亦不待起出鴉片。始能定其罪名。所謂不必栽贓者此也。又如盈箱累篋。攙入別貨之中。地窖夾牆。藏於密室之內。一經破獲。爲數孔多。非外人所得預埋。卽挾仇亦難誣陷。則犯供雖或狡展。而衆證卽是確憑。所謂不能栽贓者此也。所最宜防者。惟零星之小土。與熬熟之烟膏。價賤物微。人心因而叵測。每獲此種烟犯。臣等無不加倍留神。如本年三月間。有清遠縣人鄧亞帶。假造烟膏。裝貯一小錫盒。預藏莫亞三柴船內。商囑譚亞得張安等。引同差役往拏圖詐。當經訪獲。訊認不諱。又據番禺縣。獲到羅定人李亞有。糾同林亞士陳超等。攜帶烟膏。至番禺縣桑周氏家。藉搜查鴉片爲名。搶得番銀及首飾衣服等件。又據歸善縣營。會獲兵丁何連升等。將鄉民首繳之烟土二塊。向王大受羅亞玉等栽害。藉稱搜查。搶取番銀四圓八圓不等。又據新會縣。訪獲從九品職銜周如齡。卽周超字。因素知同縣之張亞信。有錢怕事。商同族弟周導澄等。攜帶烟槍一枝。烟盒一箇。指爲張亞信之物。將其擄捉。圖詐銀三百兩未成。經該縣訪獲周如齡。質認屬實。此外未經栽贓。平空訛詐。

之何伯達等及甫造假土。卽被訪緝之周亞榮等。亦經逐一拏獲。隨時發審。飭屬按例嚴辦。總期法無枉縱。罪當情真。庶足折服人心。卽以湔除積習。謹將歷辦情形。合詞附片奏聞。伏祈聖鑒。謹奏。

英夷兵船移泊校椅沙情形片

再英夷兵船。先後到粵。內有數船。復出老萬山。俱經臣等將來去情形。隨時奏報。並該夷寫有漢字說帖。妄稱欲阻內地行舟。及該國王遣令前往中國海境奏明等語。又經照錄夷帖。恭呈御覽在案。茲查六月初十前後。該英夷兵船。內有七隻。及車輪船二隻。又陸續開出老萬山。揚帆遠去。而日內據報。復到有兵船三隻。難保非卽前開之船。去而復至。統計現在共有夷船十隻。雖仍散泊外洋。而間有一二船。乘潮駛至。相距虎門五十餘里之校椅沙一帶。遇見內地出入之鹽船商船。卽潛遣三板攏近。探詢官兵消息。迨內地各船駛近口門。則又不敢追問。蓋夷船所恃。專在外洋空曠之處。其船尙可轉掉自如。若使竟進口內。直是魚遊釜底。立可就擒。勦辦正有把握。而彼亦揣摩已久。深悉情形。不敢冒死輕入。每日東飄西泊。莫定行蹤。夜更遊奕不停。深恐我兵復用火船潛往燒燬。揣其狡猾伎倆。無非挾制通商。勢不得不示以兵威。難容久滯。此時水陸各要隘。悉已周防。一切制勝機宜。均與水師提臣關天培。密爲商定。因現值南風盛發。師船出口。係向南行。尙須加意慎重。一得可乘之隙。卽當整隊放出外洋。大張撻伐。臣等相機籌辦。總求計出萬全。不許將備弁兵藉口遷延。亦不敢任其孟浪。至民間習見夷情虛矯。仍俱靜謐如常。堪以仰紓宸注。所有近日夷務情形。謹合詞繕片附陳。伏乞聖鑒。謹奏。

議覆葉紹本條陳捕盜事宜摺

奏爲遵旨查議捕盜事宜。謹就粵省情形。力加整頓。恭摺覆奏。仰祈聖鑒事。竊准部咨。欽奉上諭。鴻臚寺少卿葉紹本奏捕盜事宜一摺。著各直省督撫妥議具奏。欽此。臣等查原奏臚列四條。如移會隣封協捕。嚴懲牌保容留。守望宜責同邨。審案不累事主。此皆申明定例。自宜實力奉行。况粵省盜賊視他省爲尤熾。是以例上另立專條。以廣東內河劫案。夥聚四十人以上。或行劫三次。或脫逃二三年後。就獲應斬決者。均加梟示。恭請王命。先行正法。誠以海濱蠻野。不得不加倍從嚴也。臣等竊見廣東引盜之難。別有數端。而尋常之弊不與焉。一則良盜難分也。他省之民。良自良。而盜自盜。廣東不然。平時耕種之民。遇有蚤夜糾劫者。但以發財去三字。隨路招呼。鮮不欣然同往。故一同爲盜之人。彼此每不相識。卽人數亦無可稽。甚至田舍素封。衣冠巨族。亦皆樂於一試。若惠潮地方。則竟有以盜起家。轉因黨與太多。不能破案。人不敢指。官不得拏者。並有通族皆盜。通鄉皆盜。一拏卽恐滋事。不得不略審機宜。設法誘獲者。此盜風所以未易戢也。一則互劫難防也。他省之盜。只圖得財。廣東之盜。並因仇起。此邨往劫彼邨。此縣往劫彼縣。爲盜者並非貧苦。竟以挾釁行強。被盜者不卽呈官。輒先糾人報復。迨事過。則彼此互控。各匿真情。並指局外爲主謀。扳富家爲窩主。案情變幻。歧之又歧。此盜情所以未易詰也。一則原贓難起也。盜案以贓爲憑。贓真然後盜確。故別省緝盜之法。以查贓爲先。廣東則盜賊移赴墟場。無不立時賣盡。及至輾轉售賣。大都不識姓名。是以歷辦盜案。獲贓者少。無獲者多。部臣查核案情。亦皆覆准。此係歷久相沿辦法。今若必令逐案起贓。又恐差保藉端。向當舖衣莊索詐。而犯之狡展。案之懸宕。將因是而愈紛。此辦法之未易輕改也。一則夥黨難究也。訪聞粵東巨盜。每先密結親信匪黨。發誓拜盟。如遇破案到官。彼此各自熬刑。

不相供指。卽獲正賊嚴訊。往往供出同夥。非富卽仇。雖傳到審虛。立時省釋。其人業已受累。而眞夥未經供出。聞風轉已遠颺。地方官卽設法訪查。驟難得手。至各縣紳衿中。多有攻匪保良之公約。不知起自何時。其始所保所攻。未嘗不當。迨久之而漸成袒庇。難免黑白混淆。臣等惟當諭令禁止。以祛流弊。此查緝之未易得實也。一則花紅難繼也。廣東積習。官欲獲盜。必須先出花紅。從前原爲急公。迨後竟成常例。盜愈著名。則花紅愈重。若稍吝嗇。卽無從購覓線人。其有關於官員處分者。家屬親鄰。愈以居爲奇貨。卽臣等亦有欲禁而不能驟禁之勢。况花紅而外。解犯辦罪。所費尙多。地方官年遇數起盜案。賠累多端。恐開虧挪之漸。此經費之未易措籌也。以上各情形。臣等惟有隨地隨時。力加整頓。總必求臻實效。不使徒托空言。卽如保甲爲弭盜之源。而奉行非循故事。巡警爲詰奸之要。而委用務在得人。凡水路之巡船。陸路之更練。沿邨之望樓保寨。均不許有名無實。除本年春夏二季。獲犯一千三百八十八名。已於另摺核奏外。仍惟諄飭水陸文武各員。勤益加勤。密更求密。永冀萑苻斂戢。閭井安恬。以仰副聖主綏靖海疆。除莠安良之至意。所有遵旨查議緣由。據司道會詳前來。謹合詞恭摺覆奏。伏乞皇上聖鑒。謹奏。

林文忠公政書

乙集 兩廣奏稿

卷四

英逆兵船續籌剿堵摺

奏爲英逆在粵兵船。雖未敢滋事。而漸有擄船尋釁情形。現又續添兵勇。酌籌水陸剿堵。以期早靖夷氛。恭摺奏祈聖鑒事。竊照英吉利兵船。陸續到粵。去住靡常。截至本年六月下旬。尙存七隻。業將往來船數。並周密防堵情形。隨時奏聞在案。該英夷自上年斷其貿易以來。日播浮言。或稱卽有多船踵至。或稱攔截內地行舟。無非挾制通商。圖銷鴉片。臣等恪遵疊奉批諭。不事張皇。而各口防兵。倍加嚴整。彼見拒之甚力。無隙可乘。故來者旣隨到隨開。卽在者亦旋停旋駛。是先前猶未尋釁。尙可使之自困。不值海上交鋒。今則已在浙洋。妄肆鴟張。罪大惡極。自知上天朝震怒。難望仍準通商。在粵夷船。遂亦漸形猖獗。竟將海運鹽船。先後擄去十四隻。甚至槍斃民船舵工。盛全幅一名。並傷水手杜亞發一名。華民憤切同仇。指引弁兵。在洋掣獲白夷吐担噸一名。黑夷斬利及吃吐兩名。解官究辦。該英夷又信任在澳西夷。代求釋放。並稱如不允準。卽欲進澳滋擾。藉端恫喝。情實難容。雖現在英夷兵船七隻內。又向老萬山外駛去。

一船。其火輪船去而復回者。亦止一隻。惟該國尙有載貨帶烟各船。約二十餘隻。同泊在洋。其船亦有礮械。難保不串謀生事。亟應痛予剿除。前經陸續調集各營大號米艇二十隻。並雇募紅單船二十隻。拖風船二十六隻。於選配兵丁之外。復募挑壯勇千餘名。製配礮火器械。遴委將備管帶。先於內洋逐日督操。以備戰攻之用。又前後購備大船二十餘隻。均交水師提臣關天培。分派各將備隨帶應用。臣林則徐擬於本月二十日。帶印登舟。赴離省八十里之獅子洋。將所練各兵勇。親加校閱。如技藝均已精熟。卽擇日整隊。令其全出大洋。併力剿辦。臣林則徐亦赴虎門駐劄。與提臣就近籌商。隨時調度。臣怡良現值文闈期近。仍駐省城。支應一切。署廣州將軍臣奕。副都統臣英。先於五月閒。聞有英夷兵船來粵。卽經預選滿營水陸精兵一千名。咨會臣等。隨時調遣。當因省垣重地。防守尤爲緊要。仍令按段稽察。以備策應。而壯聲威。惟查師船在大洋接仗。特佔住上風。仍須相度機宜。於風潮順利之時。始令進發。不敢輕率。債事。亦不敢遷延失時。如能迅獲勝仗。擬卽由驛奏聞。仰紓聖廬。至澳門地方。久爲英夷所覬覦。而西洋中奸良不一。亦難保無暗與勾結之人。卽此次所獲英夷。與西夷本無干涉。而乃代爲稟求釋放。並以進澳滋擾之言。虛張挾制。雖所獲英夷。無足輕重。然此時若徇所請。則損威示弱。轉無以戢叵測之心。臣等不得不嚴行批駁。惟西夷旣稱兵單力薄。各有戒心。自應振我軍威。於代爲保護之中。卽寓鈐制防維之道。查澳門先調兵勇千餘名。在關閘一帶巡防。兵力尙未甚厚。臣等現又添調督撫兩標官兵。連前共合二千名。派委督標參將波啓善。署肇慶協副將多隆武。署撫標守備程步韓等。帶入澳內。與升任香山協副將惠昌耀等。會合防堵。仍責成奏委駐澳之高廉道易中孚。悉心籌策。務協機宜。不得稍涉優柔。致貽後

患。並先曉諭西洋夷衆。以澳門係天朝疆土。伊等累世受廕。渥荷深恩。豈養。今恐英夷進澳滋擾。該西夷力不能敵。是以特遣重兵來澳。與爲保護。不使他族得以占居。如西洋中竟有味良之人。潛與英夷勾結。卽須獻出懲治。倘竟被其愚弄。轉而阻撓官兵。是大昧於順逆存亡之理。必至玉石俱焚。後悔何及。且澳內一無出產。日食所需。悉資內地。卽使英夷占澳。一經斷其接濟。彼亦無以自存。第不忍使西夷並受其害。惟專心內向。則外侮自不敢欺陵。爲此明白開導。諒西夷亦不至爲英夷所愚。而澳門得此重兵。當亦可期靜謐。總使恩威並濟。操縱咸宜。以冀仰副聖主綏靖華夷至意。所有續籌剿堵情形。臣等謹會同署廣州將軍臣宗室公奕。副都統臣宗室英。水師提督臣關天培。陸路提督臣郭。合詞恭摺具奏。伏乞皇上聖鑒。謹奏。

密探定海夷情片

再臣等因粵洋現有英船。自必常通浙信。是以屢經設法。密探定海情形。偶有覓得夷信。譯出漢文。知此次領兵。攻定海城者。名曰布麻林。其統兵之夷。曰一人。名曰加至義律。係東印度水師提督。所坐夷船最大。名曰麥爾威厘。有礮七十四門。該船進定海港口時。碰於大礁之上。底穿一孔。入水甚深。幾於沈沒。又有帶兵夷官。職分頗大之阿蘭打。被我師打死。現在英逆甚望定海居民。回至該處。與之同住。而民人屢招不至。所出章程。亦無人肯信。沿海漁船。悉皆避去。各夷船本係隨帶鴉片。售作資糧。今已火食無多。轉瞬風色將轉。均甚愁急等情。是其伎倆之窮。已可概見。臣等竊思粵省民人。患其與夷相習。而此時浙省之民。轉欲其習於夷。而後便於行事。若如夷信所言。火食無多。又恐風色將轉。是正有可乘之機。與其交

鑄於海洋。未必卽有把握。莫若誘擒於陸地。逆夷更無能爲。或將兵勇扮作鄉民。或將鄉民練爲壯勇。陸續回至該處。詐爲見招而返。願與久居。一經聚有多人。約期動手。殺之將如雞狗。行見異種無遺。惟機緘不可洩露。現聞該逆中有吉吐立一名。僞爲定海縣官。其人能爲華言。更須防其詭計。臣等已具密函。飛致浙江撫臣烏。斟酌辦理。第係遙揣情形。未知當否。謹再附片密陳。伏祈聖鑒。謹奏。

關閘地方礮石洋面疊將逆夷擊退摺

奏爲粵省水陸官兵堵禦英逆。疊將逆船擊退。傷斃夷匪多名。現仍遵旨加緊嚴防。恭摺奏祈聖鑒事。竊照英吉利在粵兵船。先俱散泊外洋。未敢生端尋釁。迨聞逆黨滋擾浙洋之信。遂亦漸見鷓鴣張業。經臣等將續調官兵。雇船募勇。酌籌剿堵情形。於本年七月十九日。會摺奏聞。並陳明臣林則徐親赴離省八十里之獅子洋。校閱兵勇。就近調度在案。拜摺後。臣林則徐卽於二十日至獅子洋泊舟。將本年所派各備弁。豫練壯勇。技藝逐一親加校閱。如演放大小礮位。拋擲火毬。火礮。撤放火箭。噴筒。以及爬桅跳船各技。與水師官兵一體演試。均尙可觀。隨卽順赴虎門。與水師提臣關天培。熟商剿辦。旋據防守澳門文武各員稟報。七月二十二日未刻。英逆華偷倫等。帶領該夷各兵船。潛放三板十餘隻。與火輪船一隻。乘東風長潮之際。由九洲外洋駛至近澳迤北之關閘一帶。突然開礮。該處係前山營赴澳門經由旱路兩邊皆海。中有天然甬道一條。因在蓮花峯腳下。土人象形。名之爲蓮花莖。其適中之地。豎一關門。並設有關閘汛。把總一員。稽查來往。蓋以禁止住澳之西洋夷人。不使越此而北也。惟是澳門有西夷所立礮臺六座。而關閘至前山一帶。爲華夷交涉處所。向無官建礮臺。雖有把總酌帶汛兵。巡防守望。而地當空曠。除兵

房數間之外。障蔽全無。臣等先已慮及逆夷伺閒擣虛。恐必乘潮滋擾。以圖洩忿。早經添派兵勇協防該汛。並飭據高廉道易中孚酌築土墩。分置大小礮位。是日在事文武。瞭見夷兵船突如其來。即時開礮迎擊。因該逆火船相距較遠。其三板易於轉動。見岸上礮口所向。彼即閃避。故甫經交鋒之頃。夷船被礮者無多。迨闌內開外官兵一齊趕到。高廉道易中孚率同署澳門同知蔣立昂。香山縣丞湯聘三。由南而北。署肇慶協副將多隆武。督標參將波啓善等。由北而南。署提標遊擊阮世貴等。在中閒往來接應。升任香山協惠昌燿率領師船。駛至青洲海面。水陸夾擊。將夷船前後桅舵打傷。並擊沈三板數隻。礮斃逆夷落水者。不計其數。復有續至夷船。趕來助勢。經香山水師兵丁羅名贊。曾有良。麥朝彪。三人連轟數礮。立斃夷兵目一人。及夷兵十餘名。夷船且戰且逃。至戌刻。俱向九洲大洋竄去。該洋潮勢最急。不能撈獲夷屍。惟岸上及淺灘。陸續檢獲夷礮彈子。大小二百餘箇。重十餘斤。至三十斤不等。計接仗至三四時辰之久。查點我兵陣亡者六人。壯勇內亦傷斃三人。俱經優加獎卹。其帶兵營員內。參將波啓善。與水師守備陳宏光。頭面受傷。均堪醫愈。自關閘至澳門一帶。咸保無虞。署香山縣知縣吳思樹。因訪聞逆夷尙謀進犯前山。以圖報復。卽由香山縣城挑帶鄉勇。馳赴前山策應。併雇繪船八隻。在內河隘口堵禦。臣林則徐當又添調南韶連鎮總兵馬殿甲。帶兵七百名。三江協副將陳連升。帶兵三百名。擇要分駐。以壯聲勢。計沿海陸路。先後調防兵勇。已及八千名。布置俱甚聯絡。又據水師探報。逆夷兵船。俱由九洲仍竄迤東之磨刀洋面。閒有駛至伶仃洋之北。及礮石赤灣等處游奕。臣林則徐當與提臣關天培。在沙角海口。鼓勵各船兵勇。整隊出洋探蹤迎擊。茲據稟報。八月初五日卯刻。在冷水角。瞭見火輪船一隻。駛至龍鼓面。卽令

快艇。及原雇拖風各船。先往追躡。各放礮火。擊其船腰。該火輪船。卽刻逃去。隨探得龍穴西南。有夷兵船一隻。其東首又有夷兵船四隻。三板五隻。我師追至申刻。候選都司馬辰。與護提標右營游擊王鵬年。同坐一船。首先攏近架瀝之船。奮勇接仗。督令把總李亮。記委毛旭升。連開三千斤銅礮二門。將其前面頭鼻打壞。其船上拉繩之人。紛紛喊嚷。滾跌落海。該船先猶開礮回拒。彈如星飛。有礮子嵌入師船頭桅。量深五寸。迨被我師攻敗。傷斃多人。夷衆手忙腳亂。僅放空礮。或係船上礮子用盡。亦未可知。是時有他船趕護前來。又經師船開礮轟擊。斷其繩纜。不能駛進。惟於我師回擊他船之際。架瀝船卽乘隙隨潮南竄。時已昏黑。不及窮追。當將各船收回。於亥刻仍抵沙角。查點弁兵。受微傷者僅止數名。卽被礮各船。聞有損壞。亦皆易於修整。次日據漁船撈獲夷帽五頂。夷鞋二隻。及夷船上打落油纜三節。長二丈餘。帆槓一根。長九尺餘。又轉軸二箇。係夷船起旋推舵所用。均經繳到師船請賞。併據稱初五日晚。見有夷屍數十具。隨潮漂去。又據引水探報。夷人撈獲屍具。在磨刀山根壅埋。內有伙長一名。礮手三名。夷兵十一名。併據新安縣稟同前情。臣等查此次英逆。疊受創懲。應知震懾。惟其犬羊成性。鬼蜮居心。難保不別肆奸謀。另圖報復。又聞夷埠。尚有兵船續至。益當加意防閑。且臣等前奏。查知夷船越竄江浙緣由。茲承准軍機大臣字寄。欽奉上諭。著林則徐等嚴密周防。於水陸各要處。處準備。併嚴拏漢奸。毋使勾通接濟。該督等仍當示以鎮靜。不事張皇。是爲至要等因。欽此。謹卽恭錄。咨會提臣。欽遵辦理。查現在澳門虎門。俱有重兵駐劄。附近之香山新安等縣。亦已撥械添兵。慎固封守。其四面當海之南澳。達濠。礪州。瓊州等。以及孤懸島嶼。瀕海邨莊。均飭處處準備。併將出入之漁蟹各艇。慎密稽查。嚴杜勾通接濟。仍與在事文武。恪遵

訓諭務示鎮靜。不許稍事張皇。各市慶安謐如常。足以仰紓宸念。所有連次剿堵逆夷情形。謹會同水師提督臣關天培。陸路提督臣郭。合詞恭摺具奏。伏乞皇上聖鑒。再臣怡良。因鄉試屆期。入闈監臨。臣林則徐。卽由虎門回省。合併陳明。謹奏。

議覆團練水勇情形摺

奏爲遵旨查議團練水勇情形。恭摺覆奏。仰祈聖鑒事。竊準部咨。道光二十年七月初二日。奉上諭。給事中沈懔奏。請飭沿海各省團練水勇一摺。著沿海各將軍督撫等。酌量地方情形。妥議具奏。欽此。並鈔錄原摺前來。臣等查粵東漁人蜑戶。以及濱海居民。多以採捕爲生。不畏風濤之險。土人所稱爲水鬼者。隨在有之。如新安縣之大澳。香山縣之淇澳。陸豐縣之高螺。饒平縣之井洲。向有善泅之人。傳聞能於海底晝行夜伏。並能於船底鑿漏。沈舟。上年粵省驅逐鴉片躉船。臣林則徐與臣怡良。暨調任督臣鄧廷楨。密商。卽擬資以爲用。迨經雇募多名。逐加演試。亦僅能於內洋淺港。往來鳧泛。求其深洄數丈。潛伏多時者。實乏其人。始知向所傳聞。乃係言過其實。茲臣阿精阿到任後。留心諮訪。並據副都統臣宗室奕。告知前署將軍時。亦曾於操練旗營水兵之便。會同副都統臣宗室英。試過水勇技藝。所見遠不及所聞。然當防夷喫緊之時。恐此輩被其句作漢奸。或爲盤運鴉片利之所在。不免爭趨。仍惟收而用之。在官多一水勇。卽在洋少一匪徒。與給事中沈懔現在所陳。似已不謀而合。又因粵省沿海口岸。有三千六百餘里之遙。額設水師兵丁。實不足以敷分派。自上年以來。或由民間自行團練。以保卹莊。或由府縣雇覓壯丁。以資捍衛。卽如中路一帶。所雇練勇。用以協防礮臺隘口。並配入拖風紅單等船者。已有一千五百餘名。

疊次隨同焚剿英夷。藉可以壯軍威。而助兵力。惟是雇用此輩。流弊亦多。權宜雖在暫時。而駕馭必須得法。蓋其來從烏合。非比有制之師。而又犷悍性成。每易藉端生事。卽令舉出頭目。亦係素與習熟之人。分既不足以相臨。權亦不足以相制。全在管帶之員。弁猛寬並濟。鈐束有方。故當其招募之時。卽令查明親屬。取具的保。詳開名冊。各給腰牌。示以拊循。厚其雇值。平日勤加操練。漸以化其囂陵。臨事不藉衝鋒。祇令備爲策應。其犒勞賞卹。仍予從優。使有顧戀之心。不萌他念。第口糧安家。一切用費較繁。且若輩久處行閒。習知虛實。其中亦有所不宜。故又須加意防維。隨時稽察。果能遵守紀律。出力向前。則留營酌編入伍。否亦酌量資遣。妥爲管束。以杜日後非爲。是雇募水勇之策。係屬因時制宜。而欲其能發能收。則惟有妥籌經理。始可防其流弊也。臣等謹就粵省地方情形。遵旨查議。並會同廣州副都統臣宗室公奕。臣宗室英。合詞恭摺覆奏。是否有常。伏乞皇上聖鑒訓示。謹奏。

密陳夷務不能歇手片

再臣渥受厚恩。天良難昧。每念一身之獲咎。猶小。而國體之攸關。甚大。不敢不以見聞所及。敬爲聖主陳之。查此次英逆所憾在粵省。而滋擾乃在浙省。雖變動若出於意外。其窮蹙正在於意中。蓋逆夷所不肯灰心者。以鴉片獲利之重。每歲易換紋銀。出洋多至數千萬兩。若在粵得以復興舊業。何必遠赴浙洋。現聞其於定海一帶。大張招帖。每鴉片一斤。只賣洋錢一圓。是卽在該國孟阿拉等處。出產之區。尙且不敷成本。其所以甘心虧折。急於覓銷者。或云以給雇資。或云以充食用。並聞其在夷洋各埠。賃船雇兵而來。費用之繁。日以數萬金計。卽礮子火藥。亦不能日久支持。窮蹙之形。已可概見。又夷人向來過冬。以氈爲

暖不著皮衣。蓋其素性然也。浙省地寒。勢必不能忍受。現有夷信到粵。已言定海陰溼之氣。病死者甚多。大抵朔風戒嚴。自然捨去舟山。揚帆南竄。而各國夷商之在粵者。自六月以來。貿易爲英夷所阻。亦各氣憤不平。均欲由該國派來兵船。與之講理。是該逆現有進退維谷之勢。能不內卻於心。惟其虛憍性成。愈窮蹙時。愈欲顯其桀驁。試其恫喝。甚且別生祕計。冀得陰售其奸。如一切皆不得行。仍必帖然俛伏。臣前此屢經體驗。頗悉其情。卽此時不值與之海上交鋒。而第固守藩籬。亦足使之坐困也。夫自古頑苗逆命。初無損於堯舜之朝。我皇上以堯舜之治。治中外。知鴉片之爲害。甚於洪水猛獸。卽堯舜在今日。亦不能不爲驅除。聖人執法懲奸。實爲天下萬世計。而天下萬世之人。亦斷無以鴉片爲不必禁之理。若謂夷兵之來。係由禁烟而起。則彼之以鴉片入內地者。早已包存禍心。發之於此時。與發之於異日。其輕重當必有辨矣。臣愚以爲鴉片之流毒於內地。猶癰疽之流毒於人心也。癰疽生。則以漸而成膿。鴉片來。則以漸而致寇。原屬意計中事。若在數十年前查辦。其時吸者尙少。禁令易行。猶如未經成膿之癰。內毒或可解散。今則毒流已久。譬諸癰疽作痛。不得不亟爲拔膿。而逆夷滋擾浙洋。卽與潰膿無異。然惟膿潰。而後疾去。果其如法醫治。托裏扶元。待至膿盡之時。自然結痂收口。若因腫痛。而別籌消散。萬一毒邪內伏。誠恐患在養癰矣。溯自查辦鴉片以來。幸賴乾斷嚴明。天威震疊。躉船二萬餘箱之繳。係英夷領事義律自行遞稟求收。現有漢夷字原稟可查。並有夷紙印封可驗。繼而在虎門。燬化烟土。先期出示。準令夷人觀看。維時來觀之夷人。有撰爲夷文數千言。以紀其事者。大意謂天朝法令。足服人心。今夷書中具載其文。諒外域盡能傳誦。迨後各國來船。遵具切結。寫明如有夾帶鴉片。人卽正法。船貨沒官。亦以漢夷字合爲一。

紙自結之後。查驗他國夷船。皆已絕無鴉片。惟英逆不遵法度。且肆鴟張。是以特奉諭旨。斷其貿易。然未有浙洋之事。或尙可以仰懇恩施。今既攻占城池。戕害文武。逆情顯著。中外咸聞。非惟難許通商。自當以威服叛。第恐議者。以爲內地船礮。非外夷之敵。與其曠日持久。何如設法羈縻。抑知夷性無厭。得一步又進一步。若使威不能克。卽恐患無已時。且他國效尤。更不可不慮。臣之愚昧。務思上崇國體。下懾夷情。實不敢稍存游移之見也。卽以船礮而言。本爲防海必需之物。雖一時難以猝辦。而爲長久計。亦不得不先事籌維。且廣東利在通商。自道光元年。至今粵海關。已徵銀三千餘萬兩。收其利者。必須預防其害。若前此以關稅十分之一。製礮造船。則制夷已可裕如。何至尙形棘手。臣節次伏讀諭旨。以稅銀何足計較。仰見聖主內本外末。不言有無。誠足昭垂奕禩。但粵東關稅。旣比他省豐饒。則以通夷之銀。量爲防夷之用。從此製礮。必求極利。造船。必求極堅。似經費可以酌籌。卽裨益實非淺鮮矣。臣於夷務。辦理不善。正在奏請治罪。何敢更獻芻蕘。然苟有裨國家。雖頂踵捐糜。亦不敢自惜。倘蒙格外天恩。寬其一線。故令戴罪。前赴浙省。隨營効力。以贖前愆。臣必當殫竭血誠。以圖克復。自粵省各處口隘。防堵加嚴。察看現在情形。逆夷似無可乘之隙。藉堪仰慰宸懷。謹繕片密陳。伏祈聖鑒。謹奏。

